

119  
T CHL 2720.1132


CHINESE-JAPANESE COLLECTION  
HARVARD COLLEGE LIBRARY  
FROM HARVARD-YENCHING INSTITUTE

SEP 20 1932

明史彙編列傳第百一十二

外國七二西域一

29



明史藁

列傳第二百

光祿大夫 經筵講官明史總裁戶部尚書加七級臣王鴻緒奉

外國七

哈佛大學  
圖書館  
珍藏印

古里

柯枝

小葛蘭

大葛蘭

錫蘭山

榜葛刺

沼納樸兒

祖法兒

木骨都束

不刺哇

竹步

阿丹

刺撒

麻林

忽魯謨斯

溜山

比刺

孫刺

南巫里

加異勒

甘巴里

急蘭丹

沙里灣泥

底里

千里達

失刺比

古里班卒

刺泥

夏刺比 奇刺泥 窟察泥

烏沙刺錫 坎巴

捨刺齊 阿哇

彭加那 打回

白葛達

黑葛達

拂蘇

意大里亞

古里西洋大國西濱大海南距柯枝國北距狼奴兒國東七  
 百里距坎巴國自柯枝舟行三日可至自錫蘭山十日可至  
 諸蕃要會也永樂元年命中官尹慶奉詔撫諭其國資以綵  
 幣其酋沙米的喜即遣使從慶入朝貢方物三年達南京封  
 為國王賜印誥及文綺諸物遂比年入貢鄭和亦數使其國  
 十三年偕柯枝南淳利甘巴里滿刺加諸國入貢十四年又  
 偕瓜哇滿刺加占城錫蘭山水骨都東溜山南淳利不刺哇  
 阿丹蘇門答刺麻林刺撒忽魯謨斯柯枝南巫里沙里灣泥

彭亨諸國入貢是時諸蕃使臣充斥於廷以古里大國序其  
 使者於首十七年偕滿刺加十七國來貢十九年又偕忽魯  
 謨斯阿丹祖法兒刺撒不刺哇木骨都東柯枝加異勒錫蘭  
 山溜山南淳利蘇門答刺阿魯滿刺加甘巴里諸國入貢二  
 十一年復偕忽魯謨斯錫蘭山阿丹祖法兒刺撒不刺哇木  
 骨都東柯枝加異勒溜山南淳利蘇門答刺阿魯滿刺加諸  
 國遣使千二百人入貢時帝方出塞勅皇太子曰天時向寒  
 貢使即令禮官宴勞給賜遣還其以土物來市者官酬其直  
 自成祖崩中朝不遣使諸國諸國貢使亦不來宣德五年復  
 遣鄭和使其國八年其王比里麻遣使偕蘇門答刺柯枝錫  
 蘭山祖法兒阿丹甘巴里忽魯謨斯加異勒天方使臣入貢

其使久留都下至正統元年乃命附瓜哇貢舟西還自是不復至其國山多地瘠有穀無麥俗甚淳行者讓道道不拾遺人分五等如柯枝王敬浮屠鑿井灌佛亦如之每旦王及臣民取牛糞調水塗壁及地又煨爲灰抹額及股謂爲敬佛國中半崇回回教建禮拜寺數十處七日一禮男女齋沐謝事午時拜天於寺未時乃散王老不傳子而傳甥無甥則傳弟無弟則傳於國之有德者國事皆決於二將領以回回人爲之刑無鞭笞輕者斷手足重者罰金珠尤重者夷族沒產鞫獄不承則置其手指沸湯中三日不爛卽免罪免罪者將領導以鼓樂送還家親戚致賀富家多植椰子樹至數千其嫩者漿可飲亦可釀酒老者可作油糖亦可作飯幹可構屋葉

可代瓦殼可製松香可索絢煨爲灰可鑲金其他蔬果畜產多類中國所貢物有寶石珊瑚珠琉璃瓶琉璃枕寶鐵刀拂郎雙刃刀金繫腰阿思模達塗兒氣龍涎香蘇合油花氈單伯蘭布苾布之屬

柯枝或言卽古盤盤國宋梁隋唐皆入貢自小葛蘭西北行順風一日夜可至永樂元年遣中官尹慶齋詔撫諭其國賜以銷金帳幔織金文綺絲帛及華蓋六年復命鄭和使其國九年王可亦里遣使入貢十年鄭和再使其國連二歲入貢其使者請賜印誥封其國中之山帝遣鄭和齋印賜其王因撰碑文命勒石山上其詞曰王化與天地流通凡覆載之內舉納於甄陶者體造化之仁也蓋天下無二理生民無二心

憂戚喜樂之同情安逸飽煖之同欲奚有間於遐邇哉任君  
民之寄者當盡夫子民之道詩云邦畿千里惟民所止肇域  
彼四海書云東漸於海西被於流沙朔南暨聲教訖於四海  
朕君臨天下撫治華夷一視同仁無間彼此推古聖帝明王  
之道以合乎天地之心遠邦異域咸欲使之各得其所蓋聞  
風而慕化者非一所也柯枝國遠在西南鉅海之濱出諸蕃  
國之外慕中華而歆王化久矣命令之至拳踞鼓舞順附如  
歸咸仰天而拜曰何幸中國聖人之教沾及於我乃數歲以  
來國內豐穰居有室室食飽魚鱉衣足布帛老者慈幼少者  
敬長熙熙然而樂凌厲爭競之習無有也山無猛獸溪絕惡  
魚海出奇珍林產嘉木諸物繁盛倍越尋常暴風不興疾雨

不作札沴殄息靡有害菑誠王化之使然也朕揆德薄何能  
若是非其長民者之所致歟乃封可亦里為國王錫以印章  
俾撫治其民并封其國中之山為鎮國之山勒碑其上垂示  
無窮而系以銘曰截彼高山作鎮海邦吐煙出雲為下國洪  
龐時其雨暘肅其煩歆作彼豐穰祛彼氛妖庇於斯民靡菑  
靡沴室家胥慶優游卒歲山之嶄兮海之深矣勒此銘詩相  
為終始自後間歲入貢宣德五年復遣鄭和撫諭其國八年  
王可亦里遣使偕錫蘭山諸國來貢正統元年遣其使者附  
瓜哇貢舶還國賜勅勞王其國與錫蘭山對峙中通古里國  
界東大山西南北皆大海氣候常熱田瘠少收俗頗淳築室  
用椰子樹即取其葉為苫覆屋上雨不能漏王瑣里人尊釋

教佛座四列皆水溝復穿一井每旦鳴鐘鼓汲水灌佛再三  
始羅拜而退人分五等第一南昆王族類二回回三哲地皆  
富民四草全皆牙儂最賤者曰木瓜屋高不得過三尺衣上  
不得過臍下不得過膝途遇南昆哲地人輒伏於地俟其過  
乃起蓋極貧民為人執賤役者一歲中二三月時有少雨國  
人皆治舍儲食物以俟五六月間大雨不止街市成河七月  
始晴八月後不復雨歲歲皆然地產諸穀獨無麥諸畜亦皆  
有惟無鵝與驢

小葛蘭其國與柯枝接境自錫蘭山西北行六晝夜可達東  
大山西大海南北地窄西洋小國也永樂五年遣使附古里  
蘇門答刺入貢賜其王錦綺紗羅鞍馬諸物其使者亦可賜

王及羣下皆瑣里人奉釋教敬牛及他婚喪諸禮多與錫蘭  
全俗淳土薄收穫少仰給榜葛刺鄭和嘗使其國厥貢止珍  
珠傘白綿布胡椒又有大葛蘭波濤湍悍舟不可泊故商人  
罕至土黑墳本宜穀麥民懶事耕作歲賴烏爹之米以足食  
風俗物產多類小葛蘭

錫蘭山或言即古狼牙修梁時曾通中國自蘇門答刺順風  
十二晝夜可達永樂中鄭和使西洋至其地其王亞烈苦奈  
兒欲害和和覺去之他國其王又不睦鄰境屢邀劫往來使  
臣諸蕃皆苦之及和歸復經其地乃誘和至國中發兵五萬  
劫和舟且塞歸路和乃率部卒二千由間道乘虛攻拔其城  
生擒亞烈苦奈兒及妻子頭目獻俘於朝廷臣請行戮帝憫

其無知并妻子皆釋且給以衣食命擇其族之賢者立之諸  
俘囚咸稱耶把乃那賢乃遣使齎印誥封爲王其舊王亦遣  
歸自是海外諸蕃益服天子威德貢使載道而其王遂屢入  
貢宣德五年鄭和撫諭其國八年王不刺葛麻巴忽刺批遣  
使來貢正統元年命附瓜哇貢舶歸賜勅諭之十年偕滿刺  
加使者來貢天順三年王葛力生夏刺昔利把交刺惹遣使  
來貢嗣後不復至其國地廣人稠貨物多聚亞於瓜哇東南  
海中有山三四座總名曰翠藍嶼大小七門門皆可通舟中  
一山尤高大番名梭篤蠻山其人皆巢居穴處赤身髡髮相  
傳釋迦佛昔經此山浴於水或竊其袈裟佛誓云後有穿衣  
者必爛其皮肉自是寸布掛身輒發瘡毒故男女皆裸體但

初木葉蔽其前後故又名裸形國地不生穀惟啖魚蝦及山  
芋波羅蜜芭蕉實之屬自此山西行七日見鸚哥嘴山又二  
三日抵佛堂山卽入錫蘭國境海邊山石上有一足跡長三  
尺許故老云佛從翠藍嶼來踐此故足跡尚存中有淺水四  
時不乾人皆手蘸拭目洗面曰佛水清淨山下僧寺有釋迦  
真身側卧牀上旁有佛牙及舍利相傳佛涅槃處也其寢座  
以沉香爲之飾以諸色寶石莊嚴甚玉所居側有大山高出  
雲漢其顛有巨人足跡入石深二尺長八尺餘云是盤古遺  
跡此山產紅雅姑青雅姑黃雅姑青刺泥窟沒藍等諸色寶  
石每大雨衝流山下土人競拾之海旁有浮沙珠蚌聚其內  
光彩瀲灩王使人撈取置之池蚌爛而取其珠故其國珠寶

特富王瑣里國人崇釋教重牛日取牛糞燒灰塗其體又調之以水徧塗地上乃禮佛手足直舒腹貼於地以為敬王及庶民皆如之不食牛肉止食其乳死則瘞之有殺牛者罪至死氣候常熱米粟豐足民富饒然不喜噉飯欲噉則於暗處不令人見男子裸上體下圍以布徧體皆毫毛悉薙去惟髮不薙所貢物有珠珊瑚寶石水晶撒哈刺西洋布乳香木香樹香檀香沒藥硫黃藤竭蘆薈烏木胡椒碗石馴象之屬榜葛刺即漢身毒國東漢曰天竺其後中天竺貢於梁南天竺貢於魏唐亦分五天竺又名五印度宋仍名天竺榜葛刺則東印度也自蘇門答刺順風二十晝夜可至永樂六年其王靈牙思丁遣使來朝貢方物宴賚有差七年其使凡再至

攜從者二百三十餘人帝方招徠絕域頒賜甚厚自是比年入貢十年貢使將至遣官宴之於鎮江既將事使者告其王之喪遣官往其國致祭封嗣子賽勿丁為王十二年嗣王遣使奉表來謝貢麒麟及名馬方物禮官請表賀帝勿許明年遣侯顯齋詔使其國王與妃大臣皆有賜正統三年貢麒麟百官表賀明年又入貢自是不復至其國地大物阜城池街市聚貨通商繁華類中國四時氣候常如夏土沃一歲二稔不待耕耘俗淳龐有文字男女勤於耕織容體皆黑間有白者王及官民皆回回人喪祭冠婚悉用其禮男子皆薙髮裹以白布衣從頸貫下用布圍之曆不置閏刑有笞杖徒流數等官司上下亦有行移醫卜陰陽百工技藝悉如中國蓋皆



前世所流入也其王敬天朝聞使者至遣官具儀物以千騎來迎王宮高廣柱皆黃銅包飾雕琢花獸左右設長廊內列明甲馬隊千餘外列巨人明盔甲執刀劍弓矢威儀甚壯丹墀左右設孔雀翎傘蓋百餘又置象隊百餘於殿前王飾八寶冠箕踞殿上高座橫劍於膝朝使入令挂銀杖者二人來導五步一呼至中則止又挂金杖者二人導如初其王拜迎詔叩頭手加額開讀受賜訖設毳毯於殿宴朝使不飲酒以薔薇露和香蜜水飲之贈使者金盃金繫腰金瓶金盆其副則悉用銀從者皆有贈厥貢良馬金銀琉璃器青花白瓷鶴頂犀角翠羽鸚鵡洗白苾布兜羅綿撒哈刺糖霜乳香熟香烏香麻藤香烏爹泥紫膠藤竭烏木蘇木胡椒粗黃

沼納樸兒其國在榜葛刺之西或言卽中印度古所稱佛國也永樂十年遣使者齎勅撫諭其國賜王亦不刺金絨錦金織文綺綵帛等物十八年榜葛刺使者愬其國王數舉兵侵擾詔中官侯顯齎勅諭以睦鄰保境之義因賜之綵幣所過金剛寶座之地亦有賜然其王以去中國絕遠朝貢竟不至祖法兒自古里西北放舟順風十晝夜可至永樂十九年遣使偕阿丹刺撒諸國入貢命鄭和齎璽書賜物報之二十一年貢使復至宣德五年和再使其國其王阿里卽遣使朝貢八年達京師正統元年還國賜璽書獎王其國東南大海西北重山天時常若八九月五穀蔬果諸畜咸備人體頹頹王及臣民悉奉回回教婚喪亦遵其制多建禮拜寺遇禮拜日

市絕貿易男女長幼皆沐浴更新衣以薔薇露或沈香油拭面焚沈檀僊八兒諸香土鑪人立其上以薰衣然後往拜所過街市香經時不散天使至詔書開讀訖其王遍諭國人盡出乳香血竭蘆薈沒藥蘇合油安息香諸物與華人交易乳香乃樹脂其樹似榆而葉尖長土人斫樹取其脂爲香有駝雞頸長類鶴足高三四尺毛色若駝行亦如之常以充貢木骨都來自小葛蘭舟行二十晝夜可至永樂十四年遣使與不刺哇麻林諸國奉表朝貢命鄭和齎勅及幣偕其使者往報之後再入貢復命和偕行賜王及妃綵幣二十一年貢使又至此還其王及妃更有賜宣德五年和復頒詔其國國濱海山連地曠然穰瘠少收歲常旱或數年不雨俗頑器時

操兵習射其壘石爲屋及用魚腊飼牛羊馬駝咸如忽魯謨斯亦以不產草木之故

不刺哇與木骨都束接壤自錫蘭山別羅里南行二十一晝夜可至永樂十四年至二十一年凡四入貢並與木骨都束偕鄭和亦兩使其國宣德五年和復往使其國徇海而居地廣斥鹵少草木皆疊石爲屋有鹽池但投樹枝於中已而撈起鹽卽疑其上俗淳田不可耕蒜蔥之外無他種專捕魚爲食所產有馬哈獸狀如獐花福祿狀如驢及犀象駱駝沒藥乳香龍涎香之類常以充貢

竹步亦與木骨都束接壤永樂中嘗入貢其地戶口不繁風俗頗淳鄭和偏歷諸蕃嘗至其地地無草木疊石爲居歲多

旱曠皆與木骨都束同所產有獅子金錢豹駝蹄雞龍涎香乳香金珀胡椒之屬

阿丹在古里之西順風二十二晝夜可至永樂十四年遣使奉表貢方物辭還命鄭和齎勅及綵幣偕往賜之自是凡四入貢天子亦厚加賜賚宣德五年海外諸蕃久缺貢復命和齎勅宣諭其王抹立克那思兒卽遣使來貢八年至京師正統元年始還自後天朝不復通使遠番貢使亦不至前世梁隋唐時並有丹丹國或言卽其地地膏腴饒粟麥人性強悍有馬步銳卒七八千人鄰邦畏之王及國人悉奉回回教氣候常和歲不置閏其定時之法以月爲準如今夜見新月明日卽爲月朔四季不定自有陰陽家推算其日爲春首卽有

花開其日爲秋初卽有葉落及日月交食風雨潮汐皆能預測其王甚尊中國聞和船至躬率部領來迎入國宣詔訖徧諭其下盡出珍寶互易永樂十九年中官周姓者往市得貓睛重二錢許珊瑚樹高二尺者數株及大珠金珀諸色雅姑異寶麒麟獅子花貓鹿金錢豹駝雞白鳩以歸他國所不及也蔬果畜產咸備止無鵝與豕市肆有書籍工人所製金首飾絕勝諸番所少惟草木國人皆壘石爲居室麒麟前足高九尺後六尺頸長丈六尺有二短角牛尾鹿身食粟豆餅餌獅子形似虎黑黃色無斑首大口廣尾尖聲吼若雷百獸見之皆伏地嘉靖時製方丘朝日壇玉爵購紅黃玉於天方哈密諸蕃不可得有通事言此玉產於阿丹去土魯番西南二

千里其地兩山對峙自爲雌雄或自鳴請如永樂宣德故事  
齋重賄往購帝從部議已之

刺撒自古里順風二十晝夜可至永樂十四年遣使來貢命  
鄭和報之後凡三貢皆與阿丹不刺哇諸國偕宣德五年和  
復齋勅往使其王竟不復貢國徬海而居節候常熱田瘠少  
收然俗淳喪葬有禮有事則禱鬼神土不生草木疊石爲屋  
久旱不雨悉與竹步諸國全所產有乳香龍涎香千里駝之  
類

麻林去中國絕遠永樂十三年遣使貢麒麟將至禮部尚書  
呂震請表賀帝曰往儒臣進五經四書大全請上表朕許之  
以此書有益於治也麟之有無何所損益其已之已而麻林

與諸蕃使者以麟及天馬神鹿諸物進帝御奉天門受之百  
僚稽首稱賀帝曰此皇考厚德所致亦賴卿等翊贊故遠人  
畢來繼自今益宜秉德廸朕不逮十四年又貢方物

忽魯謨斯西洋大國也自古里西北行二十五日可至永樂  
十年天子以西洋近國已航海貢琛稽顙闕下而遠者猶未  
賓服乃命鄭和齋璽書往撫忽魯謨斯比刺溜山孫刺諸國  
賜其王錦綺絲帛紗羅妃及大臣皆有賜至忽魯謨斯王卽  
遣陪臣已卽丁奉金葉表貢馬及方物十二年至京師命禮  
官宴賜酬以馬直比還賜王及妃以下有差自是凡四貢和  
亦再使後朝使不去其使者亦久不來宣德五年復遣和宣  
詔其國其王賽弗丁乃遣使來貢八年至京師宴賜有加正

統元年附瓜哇舟還國嗣後遂絕其國居西海之極自東南諸蠻邦及大西洋商舶西域賈人皆來此貿易故寶貨填溢氣候有寒暑春發葩秋隕葉有霜無雪多露少雨土瘠穀麥寡然他方轉輸多價極賤民富俗厚或遭禍致貧衆皆遺以錢帛共振業之王及臣下俱回回人婚喪悉用其禮人多白管豐偉婦女出則以紗蔽面市列屢肆百物具備惟禁酒犯者罪至死醫卜技藝皆類中華交易用銀錢書用回回字王遵其教日齋戒沐浴處拜者五地多鹹不產草木牛羊馬駝皆噉魚腊壘石爲屋有三四層者寢處庖厠及待客之所咸在其上饒蔬果有核桃把耶松子石榴葡萄菊花紅萬年棗之屬有大山四面異色一紅鹽石鑿以爲器盛食物不加鹽而

味自和一白土可塗垣壁一赤土一黃土皆適於用所貢有獅子麒麟駝雞福祿靈羊常貢則大珠寶石之類

溜山自錫蘭山別羅里南去順風七晝夜可至自蘇門答刺過小帽山西南行十晝夜可至永樂十年鄭和往賜其國十四年其王亦速福遣使來貢自後三貢並與忽魯謨斯諸國偕宣德五年鄭和復使其國後竟不至其山居海中有三石門並可通舟無城郭倚山聚居氣候常熱土薄穀少無麥土人皆捕魚暴乾以充食王及羣下盡回回人婚喪諸禮多類忽魯謨斯山下有八溜各有名或言外更有三千溜舟或失風入其處卽有沈溺之患又有國曰比刺曰孫刺永樂十年遣鄭和齋勅往賜其國二國以去中華絕遠貢使竟不至

南巫里在西南海中永樂三年使使齎璽書綵幣撫諭其國六年鄭和復往使九年其王遣使貢方物與急蘭丹加異勒諸國偕來命禮官宴賜辭還賜其王金織文綺金繡龍衣銷金幃幔及織蓋諸物使者復宴賜遣之十四年再貢命鄭和與其使偕行後不復至

加異勒西洋小國也永樂六年遣鄭和齎勅招諭賜以錦綺紗羅九年其酋長葛卜者麻遣使奉表貢方物命賜宴及冠帶綵幣寶鈔十年和再使其國後凡三入貢宣德五年和復使其國八年又偕阿丹等十一國來貢

甘巴里亦西洋小國永樂六年鄭和使其地賜其王錦綺紗羅十三年遣使偕古里柯枝南淳利諸國來朝貢方物十九

年又偕加異勒南淳利等十六國來貢遣鄭和報之宣德五年和復招諭其國王兜哇刺札卽遣使來貢八年抵京師正統元年附瓜哇舟還國賜勅勞王其鄰境有阿撥把丹小阿蘭二國亦以六年命鄭和齎勅招諭賜全甘巴里

急蘭丹永樂九年王麻哈刺查苦馬兒遣使偕古里柯枝諸國來朝貢十年命鄭和齎勅獎其王賚以錦綺紗羅綵帛沙里灣泥永樂十四年遣使偕彭亨南巫里等十七國來獻方物命鄭和齎幣帛還賜之

底里永樂十年遣使奉璽書撫諭其王馬哈木賜絨錦金織文綺綵帛諸物其地與沼納樸兒近并賜其王亦不刺金千里達永樂十六年遣使來朝貢方物賜其使冠帶紵絲紗

羅綵帛及寶鈔比還勞賜其王有加

失刺比永樂十六年遣使朝貢賜其使冠帶金織文綺襲衣綵幣白金有差其王亦優賜

古里班卒永樂中嘗入貢其國土瘠穀少物產亦薄氣候不齊夏多雨雨即寒

刺泥永樂元年其國中回回哈只馬哈沒奇刺泥等來朝貢方物因攜胡椒與民市有司請徵其稅帝曰徵稅以抑逐末之民豈以為利今遠人慕義來乃取其貨所得幾何而虧損國體多矣其已之刺泥而外有數國曰夏刺比曰奇刺泥曰窟察泥曰捨刺齊曰彭加那曰八可意曰烏沙刺賜曰坎巴曰阿哇曰打回永樂中嘗遣使朝貢而其國之風土物產無

可稽云

白葛達宣德元年遣其臣和者里一思入貢其使臣言遭風破舟貢物盡失國主惓惓忠敬之忱無由上達此使臣之罪惟聖天子恩貸賜之冠帶俾得歸見國主知陪臣實詣闕廷庶幾免責帝許之使附鄰國貢舟還國諭之曰倉猝失風豈人力能制歸語爾主朕嘉王之誠不在物也宴賜悉如禮及辭歸帝謂禮官曰昔時漸寒海道遼遠可賜路費及衣服其國土地瘠薄崇釋教市易用鐵錢又有黑葛達亦以宣德時來貢國小民貧尚佛畏刑多牛羊亦以鐵鑄錢

拂菻即漢大秦桓帝時始通中國晉及魏皆曰大秦嘗入貢唐曰拂菻宋仍之亦數入貢而宋史謂歷代未嘗朝貢疑其

非大秦也元末其國人捏古倫入市中國元亾不能歸太祖聞之以洪武四年八月召見命齋詔書還諭其王曰自有宋失馭天絕其祀元興沙漠入主中國百有餘年天厭其昏淫亦用隕絕其命中原擾亂十有八年當羣雄初起時朕爲淮右布衣起義救民荷天之靈授以文武諸臣東渡江左練兵養士十有四年西平漢王陳友諒東縛吳王張士誠南平閩粵戡定巴蜀北定幽燕奠安方夏復我中國之舊疆朕爲臣民推戴卽皇帝位定有天下之號曰大明建元洪武於今四年矣凡四裔諸邦皆遣官告諭惟爾拂赫隔越西海未及報知今遣爾國之民捏古倫齋詔往諭朕雖未及古先哲王俾萬方懷德然不可不使天下知朕平定四海之意故茲詔告

已而復命使臣普刺等齋勅書綵幣招諭其國乃遣使入貢後不復至萬曆時大西洋人至京師言天主耶穌生於如德亞卽古大秦國也其國自開闢以來六千年史書所載世代相嬗及萬事萬物原始無不詳悉謂爲天主肇生人類之邦言頗誕謾不可信其物產珍寶之盛具見前史

意大里亞居大西洋中自古不通中國萬曆時其國人利瑪竇至京師爲萬國全圖言天下有五大洲第一曰亞細亞洲中凡百餘國而中國居其一第二曰歐羅巴洲中凡七十餘國而意大里亞居其一第三曰利未亞洲亦百餘國第四曰亞墨利加洲地更大以境土相連分爲南北二洲最後得墨瓦臘尼加洲爲第五而域中大地盡矣其說荒渺莫考然其



國人充斥中土則其地固有之不可誣也大都歐羅巴諸國悉奉天主耶穌教而耶穌生於如德亞其國在亞細亞洲之中西行教於歐羅巴其始生在漢哀帝元壽二年庚申閱一千五百八十一年至萬曆九年卒已瑪竇始汎海九萬里抵廣州之香山澳其教遂沾染中土至二十九年入京師中官馬堂以其方物進獻自稱大西洋人禮部言會典止有西洋瑣里國無大西洋其真偽不可知又寄居二十年方行進貢則與遠方慕義特來獻琛者不同且其所貢天主及天主母圖既屬不經而所攜又有神仙骨諸物夫既稱神仙自能飛昇安得有骨則唐韓愈所謂凶穢之餘不宜入宮禁者也况此等方物未經臣部譯驗徑行進獻則內臣混進之非與臣

等溺職之罪俱有不容辭者及奉旨送部乃不赴部審譯而私寓僧舍臣等不知其何意但諸番朝貢例有回賜其使臣必有宴賞乞給賜冠帶還國勿令潛居兩京與中人交往別生事端不報八月又言臣等議令利瑪竇還國候命五月未賜綸音毋怪乎遠人之鬱病而思歸也察其情詞懇切真有不願尚方錫予惟欲山棲野宿之意譬諸禽鹿久羈愈思長林豐草人情固然乞速爲頒賜遣赴江西諸處聽其深山邃谷寄跡怡老亦不報已而帝嘉其遠來假館授粲給賜優厚公卿以下重其人咸與晉接瑪竇安之遂留居不去以三十八年四月卒於京賜葬西郭外其年十一月朔日食曆官推算多謬朝議將修改明年五官正周子愚言大西洋歸化人

龐迪我能三拔等深明曆法其所攜曆書有中國載籍所未及者當令譯上以資採擇禮部侍郎翁正春等因請倣洪武初設回回曆科之例令迪我等同測驗從之自瑪竇入中國後其徒來益衆有王豐肅者居南京專以天主教惑衆士大夫暨里巷小民間爲所誘禮部郎中徐如珂惡之其徒又自誇風土人物遠勝中華如珂乃召兩人授以筆劄令各書所記憶悉舛謬不相合乃倡議驅斥四十四年與侍郎沈灌給事中晏文輝等合疏斥其邪說惑衆且疑其爲佛郎機假託乞急行驅逐禮科給事中余懋孳亦言自利瑪竇東來而中國復有天主之教乃留都王豐肅陽瑪諾等煽惑羣衆不下萬人朔望朝拜動以千計夫通番左道並有禁今公然夜聚

曉散一如白蓮無爲諸教且往來壕鏡與澳中諸番通謀而所司不爲遣斥國家禁令安在帝納其言至十二月令豐肅及迪我等俱遣赴廣東聽還本國命下久之遷延不行所司亦不爲督發四十六年四月迪我等奏臣與先臣利瑪竇等十餘人涉海九萬里觀光上國叨食大官十有七年近南北參劾議行屏斥竊念臣等焚修學道尊奉天主豈有邪謀敢墮惡業惟聖明垂憐候風便還國若寄居海嶼愈滋猜疑乞并南都諸處陪臣一體寬假不報乃怏怏而去豐肅尋變姓名復入南京行教如故朝士莫能察也其國善製砲視西洋更巨旣傳入內地華人多效之而不能有天啓崇禎間東北用兵數召澳中人入都令將士學習其人亦爲盡力崇禎時

曆法益疎舛禮部尚書徐光啓請令其徒羅雅谷湯若望等以其國新法相參較開局纂修報可久之書成卽以崇禎元年戊辰爲曆元名之曰崇禎曆書雖未頒行其法視大統曆爲密識者有取焉其國人東來者大都聰明特達之士意專行教不求祿利其所著書多華人所未道故一時好異者咸尙之而士大夫如徐光啓李之藻輩首好其說且爲潤色其文詞故其教驟興時著聲中土者更有龍華民畢方濟艾如略鄧玉函諸人華民方濟如略及熊三拔皆意大里亞國入玉函熱而瑪尼國人麗迪我依西把尼亞國人陽瑪諾波而都瓦爾國人皆歐羅巴洲之國也其所言風俗物產多夸且有職方外紀諸書在不具述

明史藁

列傳第二百一

光祿大夫

經筵講官明史總裁戶部尚書加七級

臣王鴻緒奉

敕編撰

外國八

韃靼

瓦剌

朶顏

福餘泰寧

韃靼卽蒙古故元後也太祖洪武元年大將軍徐達率師取元元王自北平遁出塞居開平數遣其將也速等寇北邊明年常遇春擊敗之師進開平俘宗王慶孫平章鼎住時元王奔應昌其將王保保據定西爲邊患三年春以徐達爲大將軍使出西安擣定西李文忠爲左副將軍馮勝爲右副將軍使出居庸擣應昌文忠至興和擒平章竹貞復大破元兵於

駱駝山遂趨應昌未至知元王已殂進圍其城克之獲元王  
孫買的里八剌及其妃嬪大臣寶玉圖籍太子愛猷復理達  
臘獨以數十騎遁去而徐達亦大破王保保兵於沈兒峪口  
走之太祖封買的里八剌爲崇禮侯諡元王曰順帝於是故  
元諸將江文清等王子失篤兒等先後歸附獨王保保擁愛  
猷復理達臘居和林屢詔諭之不從五年春命大將軍徐達  
左副將軍李文忠征西將軍馮勝率師三道征之達由中路  
出鴈門戰不利守塞勝軍西次蘭州右副將軍傅友德先進  
轉戰至埽林山勝等兵合斬其平章不花降上都驢等所部  
吏民八千三百餘戶遂由亦集乃路至瓜沙州復連敗之文  
忠東出居庸至口溫元將棄營遁乃率輕騎自臚胸河疾馳

進敗蠻子哈刺章於土刺河追及阿魯渾河又追及稱海獲  
其官屬子孫并軍士家屬千八百餘送京師達等尋召還明  
年春遣達文忠等備西北邊元兵入寇武朔達遣陳德郭子  
興擊破之未幾達等復大破王保保兵於懷柔時元兵先後  
寇白登保德河曲輒爲守將所敗獨撫寧瑞州被殘太祖乃  
徙其民於內地七年夏都督藍玉拔興和文忠亦遣裨將擒  
斬其長而自以大軍攻高州大石崖克之斬宗王大臣朶朶  
失里等至羶帽山斬魯王獲其妃蒙哥禿其秋太祖以愛猷  
復理達臘流離沙漠父子隔絕且未有後嗣乃遣崇禮侯北  
歸以書諭之又二年其部下九住等寇西邊敗去洪武十一  
年夏愛猷復理達臘卒太祖自爲文遣使弔祭子脫古思帖

不花乃兒不花樞密知院愛足等擁衆於應昌和林時出沒塞下太祖屢賜璽書諭之不從十三年春西平侯沐英師出靈州渡黃河歷賀蘭山踐流沙擒脫火赤愛足等於和林盡以其部曲歸其冬完者不花亦就擒明年春大將軍徐達副將軍湯和傅友德征乃兒不花至河北襲灰山斬獲甚衆時王保保已先愛猷復理達臘死諸巨魁多以次平定或望風歸附獨丞相納哈出擁二十萬衆據金山數窺伺遼二十年春命宋國公馮勝爲大將軍率穎昌侯傅友德永昌侯藍玉等將兵二十萬征之還其先所獲元將乃刺吾勝軍駐通州遣藍玉乘大雪襲慶州克之夏師踰金山臨江侯陳鏞失道

陷敵死乃刺吾歸備以朝廷撫恤恩語其衆於是全國公觀童來降納哈出固已入乃刺吾言復爲大軍所迫因陽使人至大將軍營納款以覘兵勢勝遣玉往受降使者見勝軍還報納哈出仰天歎曰天弗使吾有此衆矣遂率數百騎詣玉約降已將脫去爲鄭國公常茂所傷不得去都督耿忠遂以衆擁之見勝勝重禮之使忠與同寢食先後降其部曲二十餘萬人其間納哈出傷而驚潰者四萬人獲輜重畜馬亘百餘里勝班師都督濮英以三千騎殿爲潰卒所邀襲死之秋勝等表上納哈出所部官屬二百餘人將校三千三百餘人金銀銅印一百顆虎符牌面百二十五事馬二百九十餘匹稱賀太祖封納哈出爲海西侯先後賜予甚厚并授乃刺吾

十戶納哈出既降帝以故元遺寇終爲邊患乃卽軍中拜藍玉爲大將軍唐勝郭英副之耿忠孫恪爲左右參將率師十五萬往征之其冬元將脫脫等降於玉明年春玉以大軍由大寧至慶州聞脫古思帖木兒在捕魚兒海從間道馳進至百眼井哨不見敵欲引還定遠侯王弼曰吾等奉聖主威德提十餘萬衆深入至此無所得何以復命玉乃穴地而襲一夜馳至捕魚兒海黎明去敵營八十里時大風揚沙晝晦軍行無知者敵不設備弼爲前鋒直薄之遂大破其軍斬太尉蠻子數千人脫古思帖木兒以其太子天保奴知院捏怯來丞相失烈門等數十騎遁去獲其次子地保奴及妃王五十餘人渠率三千男女七萬餘馬駝牛羊十萬聚鎧仗焚之又

破其將哈刺章營盡降其衆於是漠北削平捷奏至太祖大悅賜地保奴等鈔幣命有司給供具既有言玉私元主妃者帝怒妃慙懼自殺地保奴出怨言帝居之琉球脫古思帖木兒旣遁將依丞相咬住於和林行至土刺河爲其下也速迭兒所襲衆復散獨與捏怯來等十六騎偕遁咬住來迎欲共往依闊闊帖木兒大雪不得發也速迭兒兵猝至執以去縊殺之并殺天保奴於是捏怯來失烈門等來降置之全寧衛未幾捏怯來爲失烈門所襲殺衆潰詔朵顏等衛招撫之來降者益衆二十三年春命穎國公傅友德等以北平兵從燕王定遠侯王弼等以山西兵從晉王征咬住及乃兒不花阿魯帖木兒等燕王出古北口偵知乃兒不花營迤都冒大雪

馳進去敵一積敵不知也先遣指揮觀童往觀童舊與乃兒不花善一見相持泣頃之大軍壓其營乃兒不花驚欲遁觀童止之引見王賜飲食慰諭遣還乃兒不花喜過望遂偕咬祖世脅息不敢大為寇太祖亦封燕晉諸王為邊藩鎮更歲遣大將巡行塞下督諸衛卒屯田戒之以持重寇來輒敗之而敵自脫古思帖木兒後部帥紛拏五傳至坤帖木兒咸未幾被弑不復知帝號有鬼力赤者篡立稱可汗去國號復稱韃靼成祖卽位使使諭之通好賜以銀幣并及其知院阿魯台丞相馬兒哈咱等時鬼力赤與瓦剌相仇殺數往來塞下帝敕邊將各嚴兵備之永樂三年其頭目埽胡兒察罕達魯

花等先後來歸久之阿魯台等殺鬼力赤而迎元之後本雅失里於別失八里立以為可汗六年春帝以書諭本雅失里曰自元運旣訖順帝後愛猷復理達臘至坤帖木兒凡六傳瞬息之間未聞一人善終者我皇考太祖高皇帝於元氏子孫加意撫恤來歸者輒令北還如遣脫古思帖木兒歸嗣為可汗此南北人所共知朕之心卽皇考之心茲元氏宗祧不絕如線去就之機禍福由分爾宜審處之不聽明年獲其部曲完者帖木兒等二十二人帝因復使給事中郭驥齋書往驥被殺帝怒秋命淇國公丘福為大將軍武城侯王聰同安侯火真副之靖安侯王忠安平侯李達為左右參將將精騎十萬北討諭以毋失機毋輕犯敵一舉未捷俟再舉時本雅

失里已爲瓦刺所襲破與阿魯台徙居臚胸河福率千騎先馳遇游兵擊破之軍未集福乘勝渡河追敵敵輒佯敗引去諸將以帝命止福福不聽敵衆奄至圍之五將軍皆沒帝益怒明年帝自將五十萬衆出塞本雅失里聞之懼欲與阿魯台俱西阿魯台不從衆潰散君臣始各爲部本雅失里西奔阿魯台東奔帝追及斡難河本雅失里拒戰帝麾兵奮擊一呼敗之本雅失里棄輜重孳畜以七騎遁斡難河者元太祖始興地也班師至靜虜鎮遇阿魯台帝使諭之降阿魯台欲來衆不可遂戰帝率精騎大呼衝擊矢下如注阿魯台墜馬遂大敗追奔百餘里乃還其冬阿魯台使來貢馬帝納之越二年本雅失里爲瓦刺馬哈木等所殺阿魯台已數入貢帝

俱厚報之并還其向所俘同產兄妹二人至是奏馬哈木等弑其主又擅立答里巴願輸誠內附請爲故主復仇天子義之封爲和寧王自是歲或一貢或再貢以爲常十二年帝征瓦刺阿魯台使部長以下來朝會賜米五十石乾肉酒糗綵幣有差十四年以戰敗瓦刺使來獻俘十九年阿魯台貢使至邊要劫行旅帝諭使戒戢之由是驕蹇不至阿魯台之內附困於瓦刺窮蹙而南思假息塞外帝納而封之母妻皆爲王太夫人王夫人數年生聚畜牧日以蕃盛遂慢我使者拘留之其貢使歸多行劫掠部落亦時來窺塞二十年春大入興和於是詔親征之阿魯台聞大軍出懼其母妻皆詈之曰大明皇帝何負爾而必爲逆於是盡棄其輜重馬畜於闊灤



海側以其擊直北徙帝命焚其輜重收其馬畜遂班師明年秋邊將言阿魯台將入寇帝曰彼意朕必不復出當先駐塞下待之遂部分寧陽侯陳懋爲先鋒至宿嵬山不見敵遇王子也先土干率妻子部屬來降帝封爲忠勇王賜姓名曰金忠忠勇王至京師數請擊敵自効帝曰漢過不先姑待之二十二年春開平守將奏阿魯台盜邊羣臣勸帝如忠勇王言帝復親征師次蘭荅納木兒河得諜者知阿魯台遠遁帝意亦厭兵乃下詔暴阿魯台罪惡而宥其所部來降者止勿殺車駕還崩於榆木川未幾阿魯台使來貢馬仁宗已登極詔納之自是歲修職貢如永樂時時阿魯台數敗於瓦剌部曲離散其屬把的等先後來歸朝廷皆予官職賜鈔幣詔有司

給供具自後來歸者悉如例阿魯台日益蹙乃率其屬東走兀良哈駐牧遼塞諸將請出兵掩擊之帝不聽宣德九年阿魯台復爲脫脫不花所襲妻子死孳畜略盡獨與其子失捏干等徙居母納山察罕腦刺等處未幾瓦剌脫懽襲殺阿魯台及失捏干於是阿魯台子阿卜只俺及其孫妻速木答思等喪敗無依來乞內附帝憐而撫之阿魯台旣死其故所立阿台王子及所部朶兒只伯等復爲脫脫不花所窘竄居亦集乃路外爲納款而數入寇甘涼正統元年將軍陳懋敗朶兒只伯於平川追及蘇武山頗有斬獲已而守將方政等禦之無功二年冬命都督任禮爲總兵官蔣貴趙安副之尚書王驥督師以便宜行事明年夏復敗朶兒只伯等於石城阿

台與朶兒合復敗之兀魯乃地追及黑泉又及之刁力溝出  
沙漠千里東西夾擊敵幾盡先後獲其部長一百五十人於  
是阿台朶兒只伯等來歸未幾脫脫不花捕阿台等殺之脫  
脫不花者故元後韃靼長也瓦剌脫脫不花既擊殺阿魯台悉收  
其部兼并賢義安樂二王之眾於是欲自立為可汗眾不可  
乃立脫脫不花以阿魯台眾屬之自為丞相陽推奉之而實  
不承其號令脫脫不花死子也先嗣益桀驁自雄諸部皆下之脫  
脫不花具可汗名而已脫脫不花歲來朝貢天子皆厚報之  
比諸蕃有加書稱之曰達達可汗賜賚并及其妃十四年秋  
也先謀大舉入寇脫脫不花止之曰吾儕服食多資大明何  
忍為此也先不聽曰可汗不為吾當自為遂分道俾脫脫不

花侵遼東而自擁眾從大同入帝親征之駕於土木陷焉明  
年景皇帝自監國即位尊帝為太上皇帝秋上皇歸自也先  
所事具載瓦剌傳中脫脫不花自上皇歸後修貢益勤嘗妻  
也先姊生子也先欲立之不從也先亦疑其與中國通將害  
已遂治兵相攻也先殺脫脫不花收其妻子孳畜給諸部屬  
而自立為可汗時景皇帝二年也朝廷稱也先為瓦剌可汗  
未幾為所部阿剌知院所殺韃靼部長孛來復攻破阿剌求  
脫脫不花子麻兒可兒立之號小王子阿剌死而孛來與其  
屬毛里孩等皆雄視部中於是韃靼復熾景泰六年遣使入  
貢英宗復辟遣都督馬政往賜故伯顏帖木兒妻幣孛來留  
之而使使入賀欲獻璽帝敕之曰璽已非真即真亦秦不祥

物耳獻否從爾便第無留我使以速爾禍時敵數寇威遠諸衛夏定遠伯石彪敗之於磨兒山天順二年孛來大舉寇陝西安遠侯柳溥禦之輒敗而飾小捷以聞明年春敵入安邊營石彪等破之都督周顏指揮李鑑戰死四年復寇榆林彰武伯楊信拒却之再入敗之於金雞峪未幾復大掠陝西諸邊廷臣請治各守將罪帝宥之五年春寇入平虜城誘指揮許顯等入伏殺之邊報日亟乃命侍郎白圭都御史王竑相繼往視師其秋孛來三上書求款帝使詹昇齎敕往諭孛來退兵遣使隨昇來貢已行乃請改大同舊貢道而由陝西蘭縣入許之未幾復糾其屬毛里孩等入河西明年春圭等分巡西邊圭遇敵於固原川竑遇敵於紅崖子川皆破之帝賜

璽書獎勵而敕孛來使臣仍從大同入貢時麻兒可兒復與孛來相仇殺麻兒可兒死衆共立馬古可兒吉思亦號小王子自是韃靼部長益各專擅小王子稀通中國傳襲世次多莫可考矣孛來等每歲入貢乘間數寇掠往來塞下輒以西攻瓦剌爲辭又數要劫三衛七年冬貢使及關帝却之以大學士李賢言乃止八年春御史陳選言韃靼部落孛來最強又密招三衛諸蕃相結屯任去冬來朝要我賞宴窺我虛實其犯邊之情已露而我邊關守臣因循怠慢城堡不修甲仗不利軍士不操習甚至富者納月錢而安閒貧者迫饑寒而逃竄邊備廢弛緩急何恃乞敕在邊諸臣痛革前弊其鎮守備禦等官亦宜以時黜陟庶能者知奮怠者知警至阨塞要

害之處或益官軍或設營堡或用墩臺咸須處置得宜歲遣大臣巡視如此庶邊防差備寇氛可戢報聞成化元年春孛來誘兀良哈九萬騎入遼河武安侯鄭宏禦却之其秋散掠延綏冬復大入命彰武伯楊信率山西兵都御史項忠率陝西兵禦之少却未幾復渡河曲圍黃甫川堡官軍力戰乃引去始韃靼之來也或在遼東宣府大同或在寧夏莊浪甘肅去來無常爲患不久景泰初始犯延慶然部落少不敢深入天順間有阿羅出者率屬潛入河套居之遂逼近西邊河套古朔方郡唐張仁愿築三受降城處也地在黃河南自寧夏至偏頭關延袤二千里饒水草外爲東勝衛東勝而外土平衍敵來一騎不能隱明初守之後以曠絕內徙至是孛來與

小王子毛里孩等先後繼至擄中國人爲鄉導抄掠延綏無虛時而邊事以棘二年夏大入延綏帝命楊信充總兵官都督趙勝爲副率京軍及諸邊卒二萬人討之信先以議事赴闕未至敵散掠平涼入靈州及固原長驅寇寧靜隆德諸處冬復入延綏參將湯胤勣戰死未幾諸部內爭孛來弑馬可古兒吉思毛里孩殺孛來更立他可汗斡羅出者復與毛里孩相仇殺毛里孩遂殺其所立可汗逐斡羅出而使使入貢尋渡河掠大同三年春帝命撫寧侯朱永等征之會毛里孩再乞通貢而別部長孛魯乃亦遣人來朝帝許之詔永等駐軍塞上四年秋給事中程萬里上言毛里孩久不朝貢窺伺邊疆其情叵測然臣度其有可敗者三近我邊地才二三日

程彼客我王一也兼并諸部馳驅不息既驕且疲二也比來散逐水草部落四分兵力不一三也宜選精兵二萬每三千人爲一軍統以驍將嚴其賞罰使探毛里孩所在潛師擣之破之必矣帝壯之而不能用其冬寇延綏明年春再入守將許寧等輒擊敗之冬復糾三衛入寇延綏榆林大擾六年春大同巡撫王越遣游擊許寧擊敗之楊信等亦大破之於胡柴溝時字魯乃與斡羅出合別部訛加思蘭字羅忽亦入據河套訛加思蘭舊居士魯番天順中嘗遣使朝貢朝廷使往撫諭之已乃稍引而東與諸部相雄長遂竊入套中爲久居計延綏告急帝命永爲將軍以王越參贊軍務使禦敵永至數以捷聞越等皆陞賞論功永世侯而敵據套自如七年春

永上戰守二策廷議以糧匱馬乏難於進勦請命邊將慎守禦以圖萬全於是吏部侍郎葉盛巡邊偕延綏巡撫余子俊及越議築邊牆設立臺堡其冬敵入塞參將錢亮敗績越等不能救兵部尚書白圭請擇遣大將軍專事敵會盛還越亦赴京計事乃集廷議請大發兵搜套帝乃以武靖侯趙輔爲將軍悉節制諸路王越仍督師敵大入延綏輔不能禦未幾召還以寧晉伯劉聚代之聚亦未有功而毛里孩字羅乃斡羅出稍衰敗滿魯都入河套稱可汗訛加思蘭爲太師九年秋滿魯都等與字羅忽竝寇韋州王越偵知敵盡行其老弱巢紅鹽池乃與許寧及遊擊周玉率輕騎晝夜疾馳至分薄其營前後夾擊大破之復邀擊於韋州滿魯都等敗歸則孳

畜廬帳已蕩盡妻孥皆喪亾乃相顧悲哭去自是不復居河套邊患少弭間盜邊弗敢大入亦數遣使朝貢初虬加思蘭以女妻滿魯都而立爲可汗久之殺孛羅忽併其衆益專恣無忌滿魯都部脫羅干亦思馬因謀殺之尋滿魯都亦死諸強酋相繼略盡邊人稍得息肩而是時中官汪直怙恩用事思以邊功自樹王越朱永附之十六年春邊將上言傳聞敵將渡河遽以永爲將軍直與越督師至邊未及期襲敵於威寧海子大破之又敗之於大同永晉公爵予世襲越封威寧伯直增祿至三百石未幾詔以越代永總兵於是亦思馬因等益糾衆盜邊時延及遼塞秋敵三萬騎寇大同連營五十里殺掠人畜數萬總兵許寧禦之兵敗以捷聞敵旣得利長

驅入順聖川散掠渾源朔諸州宣府巡撫秦紘總兵周玉力戰却之山西巡撫邊鏞與參將支玉等亦悉力捍禦然敵去輒復來迄成化末無寧歲時亦思馬因死其入寇者復稱小王子又有伯顏猛可王弘治元年夏小王子奉書求貢自稱大元大可汗朝廷方務優容許之自是與伯顏猛可王等屢入貢漸往來套中出沒爲寇八年北部亦卜剌因王等入套駢牧於是小王子及脫羅干之子火篩與之相倚日益強大爲東西諸邊患其年三入遼東多殺掠明年宣大延綏諸境俱被殘十一年秋王越旣節制諸邊乃率輕兵襲敵於賀蘭山後破之明年敵擁衆入大同寧夏境遊擊王杲敗績參將秦恭副總兵馬昇逗遛不進皆論死時平江伯陳銳爲總兵

侍郎許進督師久無功被劾去以保國公朱暉侍郎史琳代之太監苗達監軍十三年冬小王子復居河套明年春吏部侍郎王鏊上禦敵八策一曰定廟算二曰重主將三曰嚴法令四曰恤邊民五曰廣招募六曰用間七曰分兵八曰出奇帝命所司知之時敵以八千騎東駐遼塞下攻入長勝堡堡中人殺掠殆盡秋暉等以五路之師夜襲敵於河套斬首三級驅孳畜千餘歸賞甚厚未幾小王子以十萬騎從花馬池鹽池入散掠固原寧夏境三輔震動戕殺慘酷人髮多縈鬚宿草間十五年以戶部尚書秦紘總制陝西夏敵入遼東清河堡至密雲旋西掠偏頭關其秋復以五千騎犯遼東長安堡副總兵劉祥禦之斬首五十一級敵乃退明年稍靖十七

年春敵上書請貢許之竟不至仍入大同殺敗軍繼犯宣府及莊浪守將衛勇白玉等禦却之明年春敵二萬騎圍靈州踰月解去散掠內地指揮仇鉞總兵李祥擊走之未幾敵大舉入寇宣府總兵張俊分兵禦之大敗裨將張雄穆榮戰歿武宗嗣位復命暉琳出禦冬敵入鎮夷所指揮劉經死之更自花馬池毀垣入掠隆德靜寧會寧諸處歷兩旬乃退關中大擾以楊一清爲總制時正德元年春也劉瑾用事監軍皆閹人一清不得職去文貴才寬相繼受事二年敵入寧夏莊浪及定遼後衛諸境守將皆逮問四年敵數寇大同其冬才寬禦敵於花馬池中伏死而總兵馬昂與別部亦孛來戰於木瓜山勝之斬首三百六十五級獲馬畜六百餘軍器二千

九百二十六事明年北部亦卜刺與小王子仇殺亦卜刺竄西海阿爾禿斯與合逼脅洮西屬番屢入寇巡撫張翼總兵王勛不能制漸深入邊人苦之八年夏擁衆入討來川遣使詣翼所乞邊地駐牧修貢翼陷以金帛令遠徙亦卜刺遂西掠烏斯藏據之自是洮岷松潘無寧歲小王子數入寇殺掠慘於西陲其時復以五萬騎攻大同趣朔州掠馬邑帝命咸寧侯仇鉞總兵禦之戰於萬全衛斬敵首三級而所失亾十倍以捷聞明年秋敵連營數十寇宣大塞而別遣萬騎掠懷安總制叢蘭告急命太監張永督宣大延綏兵都督白玉爲大將協蘭守禦京師戒嚴已敵踰懷安趣蔚州至平虜城南蘭等預置毒飯於田間如農家餉而設伏以待敵至中毒伏

猝發多死者其年小王子部長卜兒孩以內難復奔據西海出沒寇西北邊十一年秋小王子以七萬騎分道入總兵潘浩與戰於賈家灣敗績裨將朱春王唐死之浩再戰再敗張永遇敵於老營坡被創走居庸敵遂犯宣府凡攻破城堡二十殺掠人畜數萬浩奪三官諸將降罰有差十二年冬小王子以五萬騎自玉林入寇屬帝幸陽和親部署總兵王勛等遇敵於應州敵圍之帝督諸將兵往援衆殊死戰敵稍却會暮止營明日敵來攻自辰至酉戰百餘合敵引而西追至平虜朔州值大風黑霧晝晦帝乃還命宣捷於朝是後敵亦歲犯邊然罕大入嘉靖四年春敵萬騎寇甘肅總兵姜瓖禦之於苦水墩斬其魁明年犯大同及宣府亦卜刺復駐牧賀蘭



山後數擾邊明年春小王子兩寇宣府參將王經開山先後戰死秋敵數萬騎入寧夏塞尚書王憲以總兵鄭卿等敗之斬三百餘級明年春掠山西夏入大同中路參將李綦禦却之冬復寇大同指揮趙源戰死十一年春小王子乞通貢未得命怒遂擁十萬騎入寇總制唐龍請許之帝不聽龍連戰頗有斬獲時小王子最富強控弦十餘萬多畜貨貝稍厭兵乃徙幕東方謂之土蠻所分諸部落在西北邊者甚衆而曰吉囊曰俺答者於小王子爲從父行據河套雄黠喜兵爲諸部長相率躡諸邊十二年春吉囊擁衆屯套內將犯延綏邊臣有備不得聞乃突以五萬騎渡河西襲亦不剌卜兒孩兩部大破之卜兒孩爲莊寧邊患久亦郎骨土魯齊諸蕃皆苦

之嘗因屬番帖木哥求貢市朝廷下守臣勘議期年未之許至是唐龍以卜兒孩衰敗遠徙西海獲寧請無更議款事吉囊等旣破西海旋竊入宣府永寧境大掠而去冬犯鎮遠關總兵王效副總兵梁震敗之於柳門又追敗之於峰窩山敵溺水死者甚衆明年春寇大同秋復由花馬池入犯梁震及總兵劉文拒却之十五年夏吉囊以十萬衆屯賀蘭山分兵寇涼州副總兵王輔禦之斬首五十七級又入莊浪境總兵姜瓖遇之於分水嶺三戰三勝之又入延綏及寧夏邊其冬復大舉犯大同時入掠宣大塞總制侍郎劉天和總督尚書楊守禮及巡撫都御史楚書皆悉力禦之十九年秋書以總兵白爵等三敗敵於萬全右衛境斬首百餘級天和以總兵

周尚文大破敵於黑水苑斬吉囊子小十王明年春守禮以總兵李義禦敵於鎮朔堡繼以總兵楊信禦敵於甘肅皆勝之秋俺荅及其屬阿不孩遣使石天爵款大同塞巡撫史道以聞詔却之而以尚書樊繼祖督宣大兵懸賞格購俺荅阿不孩首敵遂大舉內犯俺荅下石嶺關趣太原吉囊繼由平虜衛入掠平定壽陽諸處總兵丁璋遊擊周宇先後戰死諸將多獲罪繼祖獨蒙賞二十一年夏敵復遣天爵求貢大同巡撫龍大有誘縛之上之朝詭言用計擒獲帝悅擢大有兵部侍郎邊臣陞賞者數十人磔天爵於市敵怒入寇掠朔州抵廣武由太原南下沁汾襄垣長子皆被殘復從忻崞代而北屯祁縣參將張世忠督兵力戰敵圍之數重自巳至申所

殺傷相當已而世忠矢盡見殺百戶張宣張臣俱死敵遂從鴈門故道去其秋復入朔州未幾吉囊死諸子狼台吉等散處河西勢既分俺荅獨盛歲數擾延綏諸邊二十三年冬小王子自萬全右衛入至蔚州及完縣京師戒嚴二十四年秋俺荅犯延綏繼犯大同總兵張達拒却之又犯鵝鴿峪參將張鳳及指揮劉欽千戶李瓚報効生員王邦直等皆戰死會總督侍郎翁萬達及總兵周尚文嚴兵備陽和敵乃引去明年夏俺荅復使使詣大同塞求貢邊卒殺之秋復來請萬達再疏以聞帝不許敵遂以十萬騎西入保安掠慶陽環縣而東以萬騎寇錦義總督三邊侍郎曾銑率參將李珍等直搗敵巢於馬梁山後斬首百餘級敵始退銑議復河套大學士

夏言王之帝方嚮用言令銑圖上方略以便宜從事明年夏萬達復言敵自冬涉春屢求貢詞恭似宜許不聽責萬達罔瀆銑鳩兵繕塞輒破敵兵旣而帝意中變言與銑竟得罪論斬西市敵益蓄忿思逞廷臣終不敢言復套事矣二十八年春犯宣府滴水崖把總指揮江瀚董賜戰死覆全軍遂犯永寧大同總兵周尙文禦之於曹家莊大敗之斬其魁會萬達白懷來赴援宣府總兵趙國忠聞警亦率千騎追擊復連敗之是歲敵犯西塞者五二十九年春俺荅移駐威寧海子夏犯大同總兵張達林椿死之敵遽引去傳箭諸部大舉秋敵循潮河川南下至古北口都御史王汝孝率薊鎮兵禦之敵陽引滿內嚮而別遣精騎從間道潰牆入汝孝兵潰遂大掠

懷柔圍順義抵通州分兵四掠焚湖渠馬房畿甸大震俄敵大衆犯京師大同總兵戚寧侯仇鸞巡撫保定都御史楊守謙等各以勤王兵至帝拜鸞爲大將軍使護諸軍而鸞與守謙皆悞懦不敢戰兵部尙書丁汝夔恇擾不知所爲閉門守敵焚掠三日夜引去帝誅汝夔及守謙敵將出白羊口鸞尾之敵猝東返鸞出不意兵潰死傷千餘人敵乃徐由古北口出塞諸將收斬遺屍得八十餘級以捷聞方俺荅薄都城時縱所擄馬房內官楊增持書入城求貢輔臣徐階等謂當以計款之諭令退屯塞外因邊臣以請俺荅歸則遣其子脫脫陳款時鸞方用事乃議開馬市以中敵兵部郎楊繼盛上疏爭之不得明年春以侍郎史道涖其事給白金十萬開市大

同次及延寧其時叛人蕭芹呂明鎮者故以罪亾入敵挾白蓮邪教與其黨趙全丘富周原喬源諸人導俺荅爲患俺荅帀畢旋入掠邊臣責之以芹等爲辭芹詭有術能墮城敵試之不驗遂縛芹及明鎮而全富等竟匿不出俺荅復請以牛馬易粟豆求職役誥敕又潛約河西諸部內犯墮諸邊垣帝惡之詔罷馬帀召道還自是敵日寇掠西邊邊人大困三十年春敵二千騎寇大同指揮王恭禦之於平川墩戰死夏東入遼塞圍百戶常祿指揮姚大謨劉棟劉啓基等於三道溝四人皆戰歿備禦指揮王相赴援大戰於寺兒山殺傷相當敵舍去千戶葉廷瑞率百人助相明日相裹創復邀敵於蠟黎山殊死鬪矢竭遂與麾下將士三百人皆死之廷瑞被

創死復蘇敵亦引退其年凡四犯大同三犯遼陽一犯寧夏明年春犯宣府及延綏夏犯甘肅及大同守將禦之輒敗秋俺荅復大舉入寇下渾源靈丘廣昌急攻插箭浮圖等峪固原遊擊陳鳳寧夏遊擊朱玉率兵赴援大戰却之敵分兵東犯蔚西掠代繁峙已駐鄜延二十日延慶諸城屠掠幾徧乃移營中部以關涇原會久雨乃去時小王子亦乘隙爲寇犯宣府赤城未幾俺荅復以萬騎入大同縱掠至八角堡巡撫都御史趙時春禦之遇敵於大蟲嶺總兵李涑戰死軍覆時春僅以身免三十三年春入宣府紫溝堡夏復犯寧夏大同總兵岳懋中伏死其秋攻薊鎮牆百道竝進警報日數十至京師戒嚴總督楊博悉力拒守募死士夜斫其營敵驚擾乃

遁明年數犯宣薊參將趙傾葵李光啓丁碧先後戰死朝廷  
再下賞格購俺荅首賜萬金爵伯獲丘富周原者三百金授  
三品武階時富等在敵招集凶命居豐州築城自衛構宮殿  
墾水田號曰板升板升華言屋也趙全教敵益習攻戰事俺  
荅愛之甚每入寇必置酒全所問計三十五年夏敵三萬騎  
犯宣府遊擊張紘迎戰敗死冬掠大同邊繼掠陝西環慶諸  
處守將孫朝袁正等却之其年土蠻再犯遼東明年敵以二  
萬騎分掠大同邊殺守備唐天祿把總汪淵頃之俺荅弟老  
把都復擁衆數萬入河流口犯永平及遷安副總兵蔣承勳  
力戰死夏突犯宣府馬尾梁參將祁勉戰死秋復入大同右  
衛境攻毀七十餘堡所殺凶甚衆其冬俺荅子辛愛有妻曰

桃松寨私部目收令哥懼誅來降總督楊順自詡爲奇功致  
之闕下辛愛來索不得乃縱掠大同諸墩堡圍右衛數匝順  
恐詭言敵願易我以趙全丘富本兵許論以爲便乃遣桃松  
寨夜逸出塞給之西走陰告辛愛辛愛執而戮之敵狎知順  
無能圍右衛益急更分兵犯宣薊鎮西鄙震動右衛烽火斷  
絕者六閱月大學士嚴嵩與許論議欲棄右衛帝不聽詔諸  
臣發兵措餉而以兵部侍郎江東代順時故將尚表以餽餉  
入圍城悉力捍禦粟盡食牛馬徹屋爲薪士卒無變志表時  
出兵突戰獲俺荅孫及壻與其部將各一人會帝所遣侍郎  
江東及巡撫楊選總兵張承勳等各嚴兵進圍乃解未幾復  
掠永昌涼州及宣府赤城圍甘州十四日始退土蠻亦數寇

遼東三十八年春老把都辛愛謀大舉入犯駐會州而使其  
謀詭稱東下總督王忬不能察遽分兵而東號令數易敵遂  
乘間入薊鎮潘家口忬得罪夏犯大同轉掠宣府東西二城  
駐內地旬日會久雨乃退三十九年敵聚衆喜峰口外窺犯  
薊鎮大同總兵劉漢出擣其帳於灰河敵稍遠徙秋漢復與  
參將王孟夏等擣豐州擒斬一百五十人焚板升略盡是歲  
敵寇大同延綏薊遼邊無虛日明年春敵自河西踏冰入寇  
守備王世臣千戶李虎戰死秋犯宣府及居庸其冬掠陝西  
寧夏塞已復分兵而東陷蓋州四十一年夏土蠻入撫順爲  
總兵黑春所敗冬復攻鳳凰城春力戰二日夜死之海金殺  
掠尤甚冬俺荅復數犯山西寧夏塞於是延綏總兵趙尙分

部銳卒令裨將李希靖等東出神木堡擣敵帳於半坡山徐  
執中等西出定邊營擊敵騎於菽麥湖皆勝之共斬首一百  
十九級四十二年春敵入宣府滴水崖爲事官劉漢却之敵  
遂引而東數犯遼塞秋總兵楊照敗死時薊遼總督楊選囚  
繫三衛長通罕令其諸子更迭爲質通罕者辛愛妻父也冀  
以牽制辛愛三衛皆怨其冬導敵入大掠順義三河諸將趙  
溱孫贖戰死京師戒嚴已而大同總兵姜應熊禦之於密雲  
敗之敵退詔誅選明年土蠻入遼東都御史劉燾上諸將守  
禦功因言海水暴漲敵騎多沒者帝曰海若效靈下有司祭  
告燾等皆有賞冬敵犯陝西大掠板橋響聞兒諸處四十四  
年春犯遼東寧前小團山參將線補袞遊擊楊維藩死之夏

犯肅州總兵劉承業禦之再戰皆捷秋俺荅子黃台吉帥輕騎自宣府洗馬林突入散掠內地把總姜汝棟以銳卒二百伏暗莊堡猝遇黃台吉搏之黃台吉墮馬爲所部致死奪去黃台吉受傷越日始甦明年俺荅屢犯東西諸塞夏清河守備郎得功扼敵於張能峪口勝之冬大同參將崔世榮禦敵於樊皮嶺及其子大朝大賓俱戰死於時丘富死趙全在敵中益用事尊俺荅爲帝治宮殿期日上棟忽大風棟墜傷數人俺荅懼不敢復居而兵部侍郎譚綸在薊鎮善治兵全乃說俺荅無輕犯薊大同兵弱亭障稀可以逞隆慶元年俺荅數犯山西秋復率衆數萬分三道入井坪朔州老營偏頭關諸處邊將皆不能禦遂長驅攻苛嵐及汾州破石州殺知州

事王亮采屠其民復大掠孝義介休平遙文水交城太谷隰州間男女死者數萬事聞諸邊臣罰治有差而三衛勾土蠻亦同時入寇薊鎮昌黎撫寧樂亭盧龍皆被蹂躪遊騎至灤河京師震動三日乃引去諸將追之敵出義院口會大霧迷失道墮棒極崖中人馬枕籍死者頗衆諸將乃趨割其首二年敵犯柴溝守備韓尚忠戰死是時兵部侍郎王崇古鎮西邊總兵李成梁守遼東數以兵邀擊敵於塞外敵知有備入寇稍稀四年秋黃台吉寇錦州總兵王治道參將郎得功以十餘騎入敵死之冬俺荅有孫曰把漢那吉者俺荅第三子鐵背台吉子也幼孤育於俺荅妻所旣長娶婦比吉把漢復聘襖兒都司女卽俺荅外孫女貌美俺荅奪之把漢恚遂率

其屬阿力哥等十人來降大同巡撫方逢時受之以告總督王崇古崇古上言把漢來歸非擁衆內附者比宜給官爵豐館餼飭輿馬以示俺荅俺荅急之則因與媾使縛送板升諸叛人不聽卽脅誅把漢率沮之又不然因而撫納如漢置屬國居烏桓故事使招其故部徙近塞俺荅老且死黃台吉立則令把漢還以其衆與黃台吉抗我按兵助之詳具崇古傳詔可授把漢指揮使阿力哥正千戶俺荅方西掠土番聞之亟引還約諸部入犯崇古檄諸道嚴兵禦之敵未得利使來請命崇古遣譯者鮑崇德往言朝廷待把漢甚厚第能縛板升諸叛人趙全等旦送至把漢卽夕返矣俺荅大喜屏人語曰我不爲亂亂由全等若天子幸封我爲王長北方諸部孰

敢爲患卽死吾孫當襲封彼衣食中國忍倍德乎乃益發使與崇德來乞封且請輸馬與中國鐵鍋布帛互市隨執趙全李自馨等數人來獻崇古乃以帝命遣把漢歸把漢猶戀戀感泣再拜去俺荅得孫大喜上表謝崇古因上言朝廷若允俺荅封貢諸邊有數年之安可乘時修備設敵背盟吾以數年蓄養之財力從事戰守愈於終歲奔命自救不服者矣復條八事以請一議封號官職諸部行輩俺荅爲尊宜錫以王號給印信其大枝如老把都黃台吉及吉囊長子吉能等俱宜授以都督弟姪子孫如兀慎打兒漢等四十六枝授以指揮其俺荅諸婿十餘枝授以千戶一定貢額每歲一入貢俺荅馬十匹使十人老把都吉能黃台吉八匹使四人諸部長



各以部落大小爲差大者四匹小者二匹使各二人通計歲貢馬不得過五百匹使不得過百五十人馬分三等上駟三十進御餘給價有差老瘠者不入其使歲許六十人進京餘待境上使還聽以馬價市繒布諸物給酬賞其賞額視三衛及西蕃諸國一議貢期貢道其期以春月及萬壽聖節四方來同之會使人馬匹及表文自大同左衛驗入給犒賞駐邊者分送各城撫鎮驗賞入京者押送自居庸關入一立互市其規如弘治初北部三貢例蕃以金銀牛馬皮張馬尾等物商販以緞紬布匹釜鍋等物開市日來者以三百人駐邊外我兵五百駐市場期盡一月市場陝西三邊有原立場堡大同應於左衛北威遠堡邊外宣府應於萬全右衛張家口邊

外山西應於水泉營邊外一議撫賞守市兵人布二匹部長緞二匹紬二匹以好至邊者酌來使大小量加賞犒一議歸降通貢後降者不分有罪無罪免收納其華人被虜歸正者查別無竊盜乃許入一審經權一戒狡飾疏入帝下廷臣議議有異同覆勘再三帝終從崇古言遂詔封俺荅爲順義王賜紅蟒衣一襲其屬昆都力哈黃台吉授都督同知各賜紅獅子衣一襲綠幣四表裏賓兔台吉等十人授指揮同知那木兒台吉等十九人授指揮僉事打兒漢台吉等十八人授正千戶阿拜台吉等十二人授副千戶恰台吉等二人授百戶昆都力哈卽老把都也頃之兵部採崇古議定市令其秋市成凡得馬五百餘匹賜俺荅等綠幣有差於是西部吉能

及其姪切盡等亦請帝詔予帝紅山墩暨清水營帝成亦封  
吉能爲都督同知已而俺荅請金字經及刺麻僧詔給之崇  
古復請玉印詔予鍍金銀印俺荅老佞佛復請於海南建寺  
詔賜寺額仰華俺荅常遠處青山其二子曰賓兔居松山直  
蘭州之北曰丙兔居西海直河州之西竝求互帝多桀鰲俺  
荅諭之亦漸馴自是約束諸部無入犯歲來貢帝西塞以寧  
而東部土蠻數擁衆寇遼塞總兵李成梁首敗之於車山斬  
首五百八十餘級未幾守備曹簞復敗之於長勝堡神宗卽  
位頻年入犯萬曆六年成梁率遊擊秦得倚等擊敵於東昌  
堡斬其部長九人餘首級八百八十四總督梁夢龍以聞帝  
大悅祭告郊廟御皇極門宣捷七年冬土蠻四萬騎入錦川

營夢龍成梁及總兵戚繼光等已預受大學士張居正方略  
併力備禦敵始退自是敵數入成梁等數敗之輒斬其巨魁  
又時襲擊於塞外多所斬獲敵畏之少戢成梁遂以功封寧  
遠伯俺荅旣就市事朝廷甚謹部下卒有掠奪邊氓者必罰  
治之且稽首謝罪朝廷亦厚加賞賚十年春俺荅死帝特賜  
祭七壇綵緞十二表裏布一百匹示優恤其妻哈屯率子黃  
台吉等上表進馬謝復賜幣布有差遂封黃台吉爲順義王  
黃台吉改名乞慶哈立三歲而死朝廷給恤典如例十五年  
春子椿力克嗣其妻三娘子故俺荅所奪之外孫女而爲婦  
者也歷配三王主兵柄爲中國守邊保塞衆畏服之乃敕封  
爲忠順夫人當是時自宣大至甘肅不用兵者二十年及椿

力克西行遠邊而套部莊禿賴等據水塘卜失兔火落赤等據莽刺捏工兩川數犯甘涼洮岷西寧間他部落凶慮數十種出沒塞下順逆不常帝惡之十九年詔竝停捨力克市賞已而捨力克叩邊輸服率衆東歸獨莊禿賴卜失兔等寇抄如故其年冬別部明安土昧分犯榆林邊總兵杜桐禦之斬獲五百人殺明安二十年寧夏叛將哱拜等勾卜失兔莊禿賴及宰僧著力兔阿赤兔永邵卜等大舉入寇總兵李如松擊敗之二十二年延綏巡撫李春光奏套部納款已久自明安被戮而寇恨深西夏黨逆而貢市絕延鎮連年多事矣今東西各部皆乞款而卜失兔挾私叵測邊長兵寡制禦爲難宜察敵情審時勢敵入犯則血戰而已偶或小失應寬吏議

倘敵真心效順相機議撫不可怠戰備也帝命兵部傳飭各邊秋卜失兔入固原遊擊史見戰死延綏總兵麻貴禦之閱月始退全陝震動其年東部炒花犯鎮武堡總兵董一元與戰大破之明年春松部宰僧等犯陝西總督葉夢熊督却之秋海部永邵卜犯西寧總督三邊李叡檄參將達雲遊擊白澤暨馬其撒卜爾加諸屬番設伏邀擊大敗之斬首六百八十三級捷聞帝大悅且以屬番効命追敘前總制鄭雍功賞賚竝及維二十四年春總督李叡以勁兵分三道出塞襲卜失兔營共斬首四百九級獲馬畜器械數千計火落赤部衆復窺伺洮州叡遣參將周國柱等擊之於莽刺川腦斬首一百三十六級秋著力兔阿赤兔火落赤永邵卜等合謀犯西

邊炒花亦擁衆犯廣寧守將皆嚴兵却之二十五年秋海部  
寇甘鎮官軍擊走之冬炒花糾土蠻諸部寇遼東殺掠無算  
明年夏復寇遼東總兵李如松遠出擣巢死之其冬收等分  
道出襲火落赤等於松山走之復其地二十七年詔復捨力  
克市賞時收等築松山諸部紛叛延寧守臣共擊之殺獲甲  
首幾三千明年著力免宰僧莊禿賴等乞通款不許久之求  
益急邊臣王見賓等爲請詔復套部貢市三十一年海部數  
入陝西塞兵備副使李自實總兵蕭如薰達雲等先後擊走  
之三十二年夏東部宰賽誘殺慶雲堡守禦熊鑰詔革其市  
賞三十五年夏總督徐三畏言河套之部與河東之部不同  
東部事統於一約誓定歷三十年不變套部分四十二枝各

相雄長卜失兔徒建空名於上西則火落赤最狡要挾最無  
厭中則擺言太以父明安之死無歲不犯東則沙計爭爲監  
市與炒花朋暹西陲之搶攘非一日矣然衆雖號十萬分爲  
四十二枝多者不過二三千騎少者一二千騎耳宜分其勢  
納其款俾先順者獲賞後至者拒勦仍須重戰以張國威時  
已許宰賽及火落赤諸部復貢市報聞而已未幾捨力克死  
未有嗣忠順夫人率所部仍效貢職而西部銀定歹青數擁  
衆犯東西邊延綏部猛克什力亦以挾賞故常沿邊抄掠順  
義王旣死卜石兔欲婚於忠順忠順拒之其所部素囊台吉  
五路台吉等各不相下以是封號久未定四十年卜石兔  
始婚於忠順於是東西諸部長皆具狀爲請封忠順夫人旋

卒詔封卜石兔爲順義王而以把漢比妓素效恭順封忠義夫人卜石兔爲捨力克孫襲封時已少衰所制止山大二鎮外十二部其部長五路素囊及兀慎合吉等兵力皆與順義埒至是朝廷因宣大總督涂宗濬言各予陞賞如例其年炒花糾虎墩兔三犯遼東虎墩兔者居察漢兒地亦曰插漢兒王子元裔也其祖打來孫始駐牧宣塞外俺荅方強懼爲所併乃徙帳於遠收福餘雜部數入掠薊西四傳至虎墩兔遂益盛明年夏炒花復合宰賽煖兔以三萬騎入掠至平虜大寧旣求撫賞許之四十二年猛克什力寇懷遠及保寧延綏總兵官秉忠等破之斬首二百二十一明年插部數犯遼東已掠義州攻陷大安堡兵民死者甚衆四十四年總兵杜文

煥數破套部猛克什力等於延綏邊於是火落赤擺言太及吉能切盡夕青沙計東西諸部皆懼先後來請貢市四十六年我

大清兵起略撫順及開原插部乘隙擁衆挾賞西部阿暈妻滿旦亦以萬騎自石塘路入掠薊鎮白馬關及高家馮家諸堡遊擊朱萬良禦之被圍羽書日數十至中外戒嚴頃之滿旦亦叩關乞通貢四十七年

大清兵滅宰賽及北關金台什布羊古等金台什孫女爲虎墩兔婦於是薊遼總督文球巡撫周永春等以利啗之俾聯結炒花諸部以捍

大清兵給白金四千明年爲泰昌元年加賞至四萬虎乃揚

言助中國益邀索無厭天啓元年秋吉能犯延綏邊榆林總兵杜文煥擊敗之明年春復大掠延安黃花峪深入六百里殺掠居民數萬三年春銀定糾衆再掠西邊官軍擊敗之明年春復謀入故巢犯松山爲守臣馮任等所敗夏遂糾海西古六台吉等犯甘肅總兵董繼舒擊之斬三百餘級其年互青以領賞譁於邊邊人格殺之互青虎墩兔近屬也邊臣議歲給償命銀一萬三千有奇而虎怏怏益思颺去未幾大清兵襲破炒花所部皆散亾半歸於插漢時卜失兔益衰號令不行於諸部於是部長干兒罵等歲數犯延綏諸邊七慶台吉及放目比妓毛乞炭比妓等亦各擁衆往來窺伺塞下崇禎元年虎墩兔攻哈喇噠及白言台吉卜失兔諸部皆

破之遂乘勝入犯宣大塞秋帝御平臺召總督王象乾詢禦敵方略象乾對言禦插之道宜令其自相攻今卜失兔西走套內白台吉挺身免而哈喇噠所部多被鹵不足用也永邵卜最強約三十萬人合卜失兔所部并聯絡朶顏三十六家及哈喇噠餘衆可以禦插漢雖然與其構之不如撫而用之帝曰插漢意不受撫奈何對曰當從容籠絡帝曰如不款何象乾密奏語不盡聞帝善之命往與督師袁崇煥共計象乾至邊與崇煥議合皆言西靖而東自寧虎不款而東西竝急因定歲予插金八萬一千兩以示羈縻大同巡撫張宗衡上言插來宣大駢新城去大同僅二百里三閱月間未嘗跬步相近則以饑餓窮乏插與我等耳插恃撫金爲命兩年不得

資用已竭兼以巢穴未定東西馳驅食盡馬乏暴骨成莽插  
之望款不啻望歲而我遺之金繒牛羊茶果米穀無算是我  
適中其欲也插怙然悖慢耳目不忍睹聞方急款尚如是使  
插士馬豐飽其憑陵狂逞可勝道哉象乾言款局垂成而復  
勢之既示插以不信亦非所以爲國謀疏入帝是象乾議詔  
宗衡母得同異明年秋虎復擁衆至延綏紅水灘乞增賞未  
遂卽縱掠塞外總兵吳自勉禦却之旣而東附

大清兵攻龍門未幾爲

大清兵所擊六年夏插漢聞

大清兵至盡驅部衆渡河遠遁是時韃靼諸部先後歸附於  
大清明年

大清兵遂大會諸部於兀蘇河南岡頒軍律焉而虎已卒乃  
追至上都城盡俘插漢妻孥部衆其後套部歲入寧夏甘涼  
境巡撫陳奇瑜總兵馬世龍督師洪承疇等輒擊敗之而套  
部干兒罵亦爲總兵尤世祿所斬迄明世邊陲無寧致中原  
盜賊蜂起當事者徂於俺荅等貢市之便見插之恣於東也  
謂歲捐金錢數十萬冀苟安旦夕且覲收之爲用而卒不得  
迨其後也明未亾而插先斃諸部皆折入於

大清久之國計愈困邊事愈棘朝議愈紛明亦遂不可爲矣  
韃靼地東至兀良哈西至瓦剌當洪永宣世國家全盛頗受  
戎索然畔伏亦靡常正統後邊備廢弛聲靈不振諸部長多  
以雄桀之姿恃其暴強迭出與中夏抗邊境之禍遂與明終

始云

瓦刺蒙古部落也在韃靼西元亾其強臣猛可帖木兒據之  
死衆分爲三其渠曰馬哈木曰太平曰把禿孛羅成祖卽位  
遣使往告永樂初復數使鎮撫荅哈帖木兒等諭之并賜馬  
哈木等文綺有差六年冬馬哈木等遣暖荅失等隨亦刺思  
來朝貢馬仍請封明年夏封馬哈木爲特進金紫光祿大夫  
順寧王太平爲特進金紫光祿大夫賢義王把禿孛羅爲特  
進金紫光祿大夫安樂王賜印誥暖荅失等宴賚如例八年  
春瓦刺復貢馬謝恩自是歲一人貢時元主本雅失里偕其  
屬阿魯台居漠北馬哈木乃以兵襲破之八年帝旣自將擊  
破本雅失里及阿魯台兵馬哈木上言請得早爲滅寇計十

年馬哈木遂攻殺本雅失里復上言欲獻故元傳國璽慮阿  
魯台來邀請中國除之脫脫不花子在中國請遣還部屬多  
從戰有勞請加賞賚又瓦刺士馬強請予軍器帝曰瓦刺驕  
矣然不足與較賚其使而遣之明年馬哈木留敕使不遣復  
請以甘肅寧夏歸附韃靼者多其所親請給還其部帝怒命  
中官海童切責之其冬馬哈木等擁兵飲馬河將入犯而揚  
言襲阿魯台開平守將以聞帝詔親征明年夏駐蹕忽蘭忽  
失温三部埽境來戰帝麾安遠侯柳升武安侯鄭亨等先嘗  
之而親率鐵騎馳擊大破其兵斬王子十餘人部衆數千級  
追奔度兩高山至土刺河馬哈木等脫身遁乃班師明年春  
馬哈木等貢馬謝罪且還前所留使詞畀帝曰瓦刺故不足



與較受其獻館其使者明年瓦剌與阿魯台戰敗走未幾馬  
哈木死海童歸言瓦剌拒命由順寧順寧死賢義安樂皆可  
撫帝因復使海童往勞太平把秃孛羅十六年春海童偕瓦  
剌貢使來馬哈木子脫懽請襲爵帝復封脫懽爲順寧王而  
海童及都督蘇火耳灰等以綵幣往賜太平把秃孛羅及把  
秃孛羅弟昂克別使使祭故順寧王自是瓦剌復奉貢二十  
年瓦剌侵掠哈密朝廷責之使使來謝罪二十二年冬瓦剌  
部屬賽因打力來降命爲所鎮撫賜綵幣襲衣鞍馬仍令有  
司給供具自後來歸者悉如例宣德元年太平死子捏烈忽  
嗣時脫懽與阿魯台日尋兵阿魯台數敗轉徙母納山察罕  
腦刺間宣德九年脫懽襲殺阿魯台使使來告且請獻玉璽

帝賜敕曰王殺阿魯台見王克復世仇甚善顧王言玉璽傳  
世久近殊不在此王得之王用之可也仍賜紵絲五十表裏  
正統元年冬成國公朱勇言近瓦剌脫懽以兵迫逐韃靼朶  
兒只伯恐吞併之日益強大乞救各邊廣儲積以備不虞帝  
嘉納之未幾脫懽內殺其賢義安樂兩王而盡有其衆欲自  
稱可汗衆不可乃共立脫脫不花以先所併阿魯台衆歸之  
自爲丞相居漠北哈喇噠等部俱屬焉已襲破朶兒只伯復  
脅誘朶顏諸衛窺伺塞下四年脫懽死子也先嗣稱太師准  
王於是北部皆服屬也先脫脫不花具空名不復相制每入  
貢王臣竝使朝廷亦兩敕答之賜賚甚厚并及其妻子部長  
故事瓦使不過五十人利朝廷爵賞歲增至二千餘人屢敕

不奉約使往來多行殺掠又挾他部與俱邀索中國貴重難得之物稍不贖輒造釁端而所賜財物亦歲增也先攻破哈密執王及王母旣而歸之又結婚沙州赤斤蒙古諸衛破兀良哈脅朝鮮邊將知必大爲寇屢疏聞止敕戒防禦而已十一年冬也先攻兀良哈遣使抵大同乞糧并請見守備太監郭敬帝敕敬毋見毋予糧明年復致書宣府守將楊洪洪以聞敕洪禮其使報之頃之其部衆有來歸者言也先謀入寇脫脫不花止之也先不聽尋約諸番共背中國帝詔問不報時朝使至瓦剌也先等有所請乞無不許而瓦剌使來更增至三千人復虛其數以言糜餼禮部按實予之所請又僅得五之一也先大媿怒十四年七月遂誘脅諸番分道大舉入

寇脫脫不花以兀良哈寇遼東阿剌知院寇宣府圍赤城又遣別騎寇甘州也先自寇大同參將吳浩戰死猶兒莊羽書踵至太監王振挾帝親征羣臣伏闕爭不得大同守將西寧侯宋瑛武進伯朱冕都督石亨等與也先戰陽和太監郭敬監軍諸將悉爲所制失律軍盡覆瑛冕死敬伏草中免亨奔還車駕及大同連日風雨甚又軍中常夜驚人恟懼郭敬密言於振始旋師車駕還次宣府敵衆襲軍後恭順侯吳克忠拒之敗歿成國公朱勇永順伯薛綬以四萬人繼往至鷓兒嶺伏發亦盡陷次日至土木諸臣議入保懷來振顧輜重遽止也先遂追及土木地高掘井二丈不得水汲道已爲敵據衆渴敵騎益增明日敵見大軍止不行僞退振遽令移營而

南軍方動也先集騎四面衝之士卒爭先走行列大亂敵跳陣而入六軍大潰死傷數十萬英國公張輔駙馬都尉井源尚書鄺楚王佐侍郎曹鑑丁鉉等五十餘人死之振亦死帝蒙塵北狩中官喜寧從也先聞車駕至錯愕未之信及見致禮甚恭奉帝居其弟伯顏帖木兒營以先所掠校尉袁彬來侍也先將謀逆會大雷雨震死也先所乘馬復見帝寢幄有異瑞乃止也先擁帝至大同城索金幣都督郭登與白金三萬登復謀奪駕入城帝沮之不果也先遂擁帝北行九月虜王自監國即皇帝位尊帝為太上皇帝也先詭稱奉上皇還由大同陽和抵紫荆關攻入之直前犯京師兵部尚書于謙督武清伯石亨都督孫鏜等禦之也先邀大臣出迎上皇未

果亨等與戰數敗之也先夜走自良鄉至紫荆大掠而出都督楊洪復大破其遺眾於居庸也先仍以上皇北行也先夜常於御幄上遙見赤光奕奕若龍蟠大驚異也先又欲以妹進上皇上皇却之益敬服時時殺羊馬置酒為壽稽首行君臣禮景泰元年也先復奉上皇至大同郭登不納仍謀欲奪上皇也先覺之引去初也先有輕中國心及犯京師見中國兵強城池固始大沮會中國已誘誅賊奄喜寧失其間諜而脫脫不花阿剌知院復遣使與朝廷和皆撤所部歸於是也先亦遂決意息兵其秋帝遣侍郎李實少卿羅琦指揮馬政等齎璽書往諭脫脫不花及也先而脫脫不花也先所遣皮兒馬黑麻等已至帝因復使都御史楊善侍郎趙榮指揮王

息千戶湯盾勸往也先語實兩國利速和迎使夕至大駕朝發但當遣一二大臣來實歸善等至致奉迎上皇意也先曰上皇歸當仍作天子邪善曰天位已定不再更也先引善見上皇遂設宴餞上皇行也先席地彈琵琶妻妾奉酒顧善曰都御史坐善不敢坐上皇曰太師著坐便坐善承坐卽起周旋其間也先顧善曰有禮伯顏等亦各設餞畢也先築土臺坐上皇臺上率妻妾部長羅拜其下各獻器用飲食物上皇行也先與部衆皆送約半日程也先伯顏乃下馬伏地慟哭曰皇帝行矣何時復得相見良久乃去仍遣其頭目七十人送至京上皇歸後瓦剌歲來致貢上皇所亦別有獻於是帝意欲絕瓦剌不復使使往也先以爲請尚書王直金濂胡濙

等亦相繼言絕之且起釁帝曰遣使有前事適以滋釁耳曩瓦剌入寇時豈無使邪因救也先曰前者使往小人言語短長遂致失好朕今不復遣而太師請之甚無益也太師使朕皆優禮厚給之顧亦須少人賞賚乃得厚匹何也先與脫脫不花內相猜脫脫不花妻也先姊也也先欲立其姊子爲太子不從也先亦疑其通中國勤將謀已遂治兵相攻脫脫不花敗走也先追殺之執其妻子以其人畜給諸部屬遂乘勝迫脅諸蕃東及建州兀良哈西及赤斤蒙古哈密三年冬使使來賀明年正旦尚書王直等復請答使報之下兵部議兵部尚書于謙言臣職司馬知戰而已行人事非所敢聞詔仍毋遣使明年冬也先自立爲可汗以其次子爲太師來朝書

稱大元田盛大可汗末曰添元元年田盛猶言天聖也報書稱曰瓦刺可汗未幾也先復逼徙朶顏所部於黃河母納地也先恃強日益驕荒於酒色六年阿刺知院攻也先殺之而韃靼部孛來復殺阿刺奪也先母妻并其玉璽於是也先諸子火兒忽荅等徙居于趕河弟伯都王姪兀忽納等往依哈密伯都王哈密王母之弟也英宗復辟之三年哈密為請封詔授伯都王都督僉事兀忽納指揮僉事自也先死瓦刺遂衰部屬分散其承襲代次多不可考天順中瓦刺阿失帖木兒屢遣使入貢朝廷以其為也先孫循例厚賚之又捨力克者常與孛來相仇殺又拜亦撒哈者常偕哈密來朝久之其長曰克捨頗強數糾韃靼小王子入寇克捨死養罕王稱雄

擁精兵數萬克捨弟阿沙為太師成化二十三年養罕王謀犯邊哈密罕恆來告養罕不利去憾哈密兵還掠其大土刺弘治初瓦刺中稱太師者一曰火兒忽力一曰火兒古倒溫皆使使朝貢土魯番據哈密都御史許進以金帛厚啗二部令以兵擊走之久之其部長卜六王者屯駝把思闕正德十三年土魯番犯肅州守臣陳九疇因遺卜六王綵幣使乘虛襲破土魯番三城殺鹵以萬計土魯番畏逼與之和嘉靖九年復以議婚相仇隙土魯番益強瓦刺數困敗又所部輒自殘多歸於中國哈密復乘間侵掠卜六王不支亦求內附朝廷不許遣出關後竟不知所終朶顏福餘泰寧高皇帝所置三衛也其地為兀良哈在黑龍

橫雲山人集 列傳一百一  
江南漁陽塞北漢鮮卑唐吐谷渾宋契丹皆其種類元爲大  
寧路北境高皇帝有天下東蕃遼王惠寧王朶顏元帥府相  
率乞內附於是卽古會州地置大寧都司營州諸衛封子權  
爲寧王使鎮焉已數爲韃靼所抄洪武二十二年乃置泰寧  
朶顏福餘三衛指揮使司俾其頭目各自領其衆以爲聲援  
自大寧前抵喜峰口近宣府曰朶顏自錦義歷廣寧至遼河  
曰泰寧自黃泥窪逾瀋陽鐵嶺至開原曰福餘獨朶顏地險  
而強久之皆叛去成祖從燕起靖難惠寧王躡其後自永平  
攻大寧入之謀脅寧王因厚賂三衛說之來成祖行寧王餞  
諸郊三衛從一呼皆起遂擁寧王西入關成祖復遷其三千  
人爲奇兵從戰天下既定徙寧王南昌徙行都司於保定遂

盡割大寧地畀三衛以償其前勞帝踐阼之初遣百戶裴牙  
失里等往告永樂元年復使指揮蕭尚都齎敕諭之明年夏  
其頭目脫兒火察等二百九十四人隨尚都來朝貢馬於是  
命脫兒火察爲左軍都督府都督僉事哈兒兀歹爲都指揮  
同知掌朶顏衛事安出及止不申俱爲都指揮僉事掌福餘  
衛事忽刺班胡爲都指揮僉事掌泰寧衛事餘未至者三百  
五十七人各授指揮千百戶等官賜誥印冠帶及白金鈔幣  
襲衣自是三衛朝貢不絕三年冬命來朝頭目阿散爲泰寧  
衛掌衛事都指揮僉事其朶兒朶臥等亦各陞賞有差四年  
冬三衛飢請以馬易米帝命有司第其馬之高下各倍價給  
之久之陰附韃靼數掠去邊戍復假帑馬來窺伺帝下詔切

責令其以馬贖罪十二年春遂納馬三千於遼東帝敕守將  
王直仍一馬各予布四匹何復叛附阿魯台二十年帝親  
征阿魯台還擊之大敗其衆於屈烈河斬馘無算來降者釋  
勿殺仁宗嗣位詔三衛許自新洪熙元年安出奏其印爲寇  
所奪請更給許之冬三衛頭目阿者禿來歸授千戶賜鈔幣  
襲衣鞍馬仍命有司給供具自後來歸者悉如例宣宗初三  
衛掠永平山海間帝將親討之三衛頭目皆謝罪入貢朝廷  
撫納之如初七年更給泰寧衛印其秋以朶顏頭目哈刺哈  
孫福餘頭目安出泰寧頭目脫火赤等恭事朝廷久加賜織  
金綵幣表裏有差正統間屢寇遼東大同延安境獨石守備  
楊洪擊敗之擒其頭目朶欒帖木兒未幾復附瓦剌也先泰

寧拙赤妻也先以女皆陰爲之耳目入貢輒易名且互用其  
印又東合建州兵入廣寧前屯帝惡其反覆九年春命成國  
公朱勇偕恭順侯吳克忠出喜峰興安伯徐亨出界嶺都督  
馬亮出劉家口都督陳懷出古北各將精兵萬人分勦之勇  
等捕其擾邊者致闕下并奪回所掠人畜未幾拙赤等拘肥  
河衛使人殺之肥河衛頭目別里格與戰於格魯坤迭連拙  
赤大敗瓦剌復分道截殺建州亦出兵攻之三衛大困十二  
年春總兵曹義參將胡源都督焦禮等分巡東邊值三衛入  
寇掠擊之共斬首三十二級擒七十餘人其年瓦剌賽刊王  
復擊殺朶顏乃兒不花大掠以去也先繼至朶顏泰寧皆不  
支乞降而福餘獨走避腦溫江於是三衛益衰畏瓦剌強不

敢背仍歲來致貢止以利中國賜資而已又心銜邊將勦殺故常潛圖報復十四年夏大同參將石亨等復擊其盜邊者於箭谿山擒斬五十人三衛益怨其秋導瓦刺大入英宗遂以是役北狩景泰初朝廷仍遣使撫諭三衛受也先旨數以非時入貢多遣使往來伺察中國既而也先虐使之復逼徙朶顏所部於黃河母納地三衛皆不堪遂陰輸瓦刺情於中國而請得近邊屯駐舊制三衛每歲三貢其貢使俱從喜峰口驗入有急報則許進永平時三衛使有白獨石及萬全右衛來者邊臣以爲言敕止之天順中嘗乘間掠諸邊復竊通韃靼孛來每爲之鄉導所遣使與孛來使正偕見中國待韃靼厚請加賞不得大忿遂益與孛來相結成化元年其頭目

朶羅干等以兵從孛來大入遼河已復西附毛里孩東合海西兵數入塞又時獨出沒廣寧義州間九年遼東總兵歐信以偏將韓斌等敗之於興中追及麥舟斬首六十二獲馬畜器械幾數千其年喜峰守將吳廣以貪賄失三衛心三衛入犯廣下獄死明年復掠開原慶雲參將周俊擊退之十四年詔復三衛馬市初國家設遼東馬市三一城東一廣寧皆以待三衛正統間以其部衆屢叛罷之會韃靼滿都魯暴強侵掠三衛三衛頭目皆走避塞下數饑困請復馬市再四不許至是巡撫陳鉞爲帝言始許之滿都魯死亦思馬因主兵柄三衛復數爲所窘二十二年韃靼別部那孩復擁三萬衆入大寧金山涉老河攻殺三衛頭目伯顏等掠去人畜以萬計



三衛乃相率攜老弱走匿邊圉邊臣劉滹以聞詔予芻糧優卹之弘治初常盜掠古北開原境既悔罪而守臣張玉總兵李杲等以計誘斬其來市者三百人遂北結脫羅干請爲復仇數寇廣寧寧遠諸處時海西尚古者以不得通貢叛中國數以兵阻諸蕃入貢諸蕃竝銜之朝廷旋許尚古納款於是撫寧猛克帖木兒等皆以尚古爲辭入寇遼陽殺掠甚衆未幾韃靼小王子屢掠三衛三衛因各叩關輸罪朝廷許之然陽爲恭順而已朶顏都督花當者恃險而驕數請增貢加賞不許正德十年花當遣其子把兒孫以千騎毀鮎魚關入大掠馬蘭谷參將陳乾戰死復以五百騎入板場谷千騎入神山嶺又千餘騎入水開洞事聞命副總兵桂勇禦之花當旋

退去屯駐紅羅山匿把兒孫而使其子打哈等入朝請罪詔釋不問十三年帝巡幸至大喜峰口將徵三衛頭目使悉詣關下宴勞都御史臧鳳等疏止之不報尋亦不果當把兒孫犯邊時朝廷詔削其職把兒孫死其子伯革入貢嘉靖九年詔予伯革父爵而打哈自以花當子不得職怒遂先後掠冷口擦崖喜峰間參將袁繼勳等失於防禦皆逮治十七年春指揮徐顯誘殺泰寧部九人其頭目把當亥率衆寇大清堡總兵馬永擊斬之其屬把孫以朶顏部衆復入鎮守少監王永與戰敗績二十二年冬攻圍菓田谷殺守備陳舜副總兵王繼祖等赴援擊斬三十餘級其年詔罷舊設三衛馬市并新設木市亦罷之秋三衛復導韃靼寇遼州入沙河堡守將

張景福戰死三衛之迭犯也實朶顏部哈舟兒陳通事爲之二人者俱中國人被鹵遂爲三衛用二十九年韃靼俺荅謀犯畿東舟兒爲指潮河川路俺荅移兵白廟近古北舟兒詐言敵已退邊備緩俺荅遂由鴿子洞曹榆溝入直犯畿甸已俺荅請開馬市舟兒復往來誘阻之三十年薊遼總督何棟購捕至京伏誅而朶顏通罕者俺荅子辛愛妻父也四十二年古北哨卒出關爲朶顏所撲殺俄通罕叩關索賞副總兵胡鎮伏兵執之總督楊選將爲牽制辛愛計乃拘繫通罕令其諸子更迭爲質三衛恨甚遂導俺荅入掠順義及三河選得罪萬曆初朶顏長昂益強陝賞不遂數與其屬董狐狸等糾衆入掠截諸蕃貢道十二年秋復導土蠻以四千騎分掠

三山三道溝錦川諸處守臣李松請急勦長昂等朝議不從僅革其月賞未幾復以千騎犯劉家口官軍禦之殺傷相當於是長昂益跋扈自恣東勾土蠻西結婚白洪大以擾諸邊十七年合韃靼東西二部寇遼東總兵李成梁逐之官軍大敗殲者八百人又二年大掠獨石路二十二年復擁衆犯中後所攻入小屯臺副總兵趙夢麟秦得倚等力戰却之明年潛入喜峰口官軍擒其頭目小郎兒二十九年長昂與董狐狸等皆納款請復寧前木市許之三十四年冬復糾韃靼班不什白言台吉等以萬騎迫山海關總兵姜顯謨擊走之長昂復以三千騎窺義院界邊將有備乃引去旋詣喜峰自言班白入寇已不預知守臣具以聞詔長昂復通貢市頒給撫

賞如例頃之長昂死諸子稍衰三衛皆靖至崇禎初嘗與插  
漢戰於早落兀素勝之殺獲萬計以捷告未幾皆服屬於  
大清

則遊者八百  
計少半合對時東西二嶺溪蓋東聯兵李烈業逐之官軍大  
外長尋昂益趨臥自恣東區土雜西謀殺自燕大以對清數  
嶺華其以賞未幾與以于湖城據家自守軍警之聲與時當  
三山三嶽番險阻清與守留李烈業逐之與昂等不與

明史藁

列傳第二百一

光祿大夫 經筵講官明史總裁戶部尚書加七級 王鴻緒奉

敕編撰

西域一

哈密衛

柳城

火州

土魯番

哈密東去嘉峪關一千六百里漢伊吾盧地明帝置宜禾都  
尉領屯田唐為伊州宋入於回紇元末以威武王納忽失里  
鎮之尋改為肅王卒弟安克帖木兒嗣洪武中太祖既定畏  
兀兒地置安定等衛漸逼哈密安克帖木兒懼將納款及成  
祖初遣官招諭之許其以馬市易即遣使來朝貢馬百九十

四永樂元年十一月至京帝喜賜賚有加又命有司給直收其市易馬四千七百四十四匹擇良者十匹入內廐餘以給守邊騎士明年六月復貢請封廷議言彼故王爵宜仍其舊改封之帝曰前代封爵不足論但取誠心向化因而封之俾守其地乃封爲忠順王賜金印其王貢馬謝恩已而爲迤北可汗鬼力赤毒死其國人以病卒聞三年二月遣官賜祭以其兄子脫脫爲王賜玉帶脫脫自幼俘入中國帝拔之奴隸中俾列宿衛欲令嗣爵慮其祖母及諸頭目不從遣官問之諸人不敢違請還王其衆故有是命因賜其祖母及母綵幣旋遣使貢馬謝恩四年春甘肅總兵官宋晟奏脫脫爲祖母所逐帝怒敕責其頭目曰脫脫朝廷所立即有過不奏而擅逐

之是慢朝廷也老人昏耄頭目亦不知朝廷邪卽迎歸善厓輔俾孝事祖母由是脫脫得還祖母及頭目各遣使謝罪三月立哈密衛以其頭目馬哈麻火者等爲指揮千百戶等官又以周安爲忠順王長史劉行爲紀善輔導其王其冬授頭目十九人爲都指揮等官明年宋晟奏頭目陸十等作亂已誅慮他變請兵防禦帝命晟發兵應之而以安克帖木兒妻子往依鬼力赤恐誘賊侵哈密敕晟謹備未幾晟卒以何福代又敕福開誠撫忠順毋却其禮物以生嫌會頭目請設把總一人理國政帝敕福曰置把總是增一王也政令不一下安適從寢其議自是比歲朝貢悉加優賜其使臣皆增秩授官以爲常然帝眷脫脫特厚而脫脫顧凌侮朝使沈湎昏聩

不恤國事其下買任等交諫不從帝聞之怒八年十一月遣  
官賜敕戒諭之未至而脫脫以暴疾卒訃聞遣官賜祭擢都  
指揮同知哈刺哈納爲都督僉事鎮守其地賜敕及白金綵  
幣且封脫脫從弟兔力帖木兒爲忠義王賜印誥玉帶世守  
哈密十年貢馬謝恩自是修貢惟謹故王祖母亦數奉貢十  
七年帝以朝使往來西域者忠義王致禮延接命中官齎綺  
帛勞之賜其母妻金珠冠服綵幣及其部下頭目其使臣及  
境內回回尋貢馬三千五百餘匹及貂皮諸物詔賜鈔三萬  
二千錠綺百帛一千二十一年貢駝三百三十馬千匹仁宗  
踐阼詔諭其國洪熙元年再入貢方賀卽位而仁宗巴剌宣  
宗繼統其王兔力帖木兒亦卒使來告哀宣德元年遣官賜

祭命故王脫脫子卜荅失里嗣忠順王且以登極肆赦命其  
國中亦赦其王貢馬謝恩明年遣弟北斗奴等來朝貢駝馬  
方物授北斗奴都督僉事因命中官諭王遣故忠義王弟脫  
歡帖木兒赴京三年以下荅失里年幼命脫歡帖木兒嗣忠  
義王同理國事自是二王並貢歲或三四至奏求婚娶禮幣  
命悉子之正統二年脫歡帖木兒卒封其子脫脫塔木兒爲  
忠義王未幾卒已而忠順王亦卒封其子倒瓦荅失里爲忠  
順王五年遣使三貢廷議以爲祭定令每年一貢初成祖之  
封忠順王也以哈密爲西域要道欲其迎護朝使統領諸蕃  
爲西陲屏蔽而其王率庸懦又其地種落雜居一曰回回一  
曰畏兀兒一曰哈刺灰其頭目不相統屬王莫能節制衆心

離渙國勢漸衰及倒瓦荅失里立都督皮刺納潛通瓦刺猛可卜花等謀殺王不克王父在時納沙州叛囚百餘家屢敕王令還止遣其半其貢使又數辱驛吏卒呵叱通事當四方貢使大宴日惡言詬詈天子不加罪但令慎擇使臣以是益無忌其地北瓦刺西土魯番東沙州罕東赤斤諸衛悉與構怨由是鄰國交侵罕東兵抵城外掠人畜去沙州赤斤先後兵侵皆大獲瓦刺酋也先王母努溫荅失里弟也亦遣兵圍哈密城殺頭目俘男婦掠牛馬駝不可勝計取王母及妻北還脅王往見王懼不敢往數遣使告難中國亦衰弱聲靈不能震雖爲數頒敕命令諸部修好迄不見從惟王母妻獲還十年也先復取王母妻及弟并掠撒馬兒罕貢使百餘人又

數趣王往見王外順朝命實懼也先十三年夏親詣瓦刺居數月方還而遣使誑天子謂守朝命不敢往天子爲賜敕褒嘉已知其詐嚴旨詰責然其王迄不能自振會也先方東犯不復還故土以是哈密獲少安景泰三年遣其臣捏列沙朝貢請授官先是使臣至京必加恩命是時于謙掌中樞言哈密世受國恩乃敢交通瓦刺今雖歸款心猶譎詐若加官秩賞出無功乃止終景泰世使臣無授官者天順元年倒瓦荅失里率弟卜列革遣使告哀卽封爲忠順王時都指揮馬雲使西域聞迤北酋訛加思蘭梗道不敢進會哈密王報道已通雲乃行至哈密而賊兵實未退且謀劫朝使帝疑王與賊通遣使切責四年王卒無子母努溫荅失里主國事初也先

被誅其弟伯都王及從子兀忽納走居哈密王母爲上書乞恩授伯都王都督僉事兀忽納指揮僉事自卜列革之亾親屬無可繼命國人議當襲者久不定頭目阿只等言脫歡帖木兒外孫把塔木兒官都督同知可繼王母謂臣不可繼君而安定王阿兒察與忠順王同祖爲請襲封七年冬奏上禮官言札加思蘭見哈密無主謀據其地勢危急乞從其請帝命都指揮賀玉往至西寧逗遛不進哈密使臣苦兒魯海牙請先行又不許帝逮玉下吏改命都指揮李珍而敕安定罕東護使臣偕往阿兒察以哈密多難力辭不行珍乃返哈密素衰微又婦人主國衆益離散札加思蘭乘隙襲破其城大肆殺掠王母率親屬部落走苦峪猶數遣使朝貢且告難朝

廷不能援但救其國人速議當繼者而已其國以殘破故來者日衆成化元年禮官姚夔等言哈密貢馬二十四匹而使人乃二百六十人以中國有限之財供外蕃無益之費非策帝下廷臣議定歲一入貢不得過二百人制可明年兵部言王母避苦峪久今賊兵已退宜令還故土從之已而貢使言其地饑寒男婦二百餘人隨來而食不能歸國命人給米六斗布二匹遣之初國人請立把塔木兒以王母不肯無王者八年至是頭目交章請詞極哀乃擢把塔木兒爲右都督攝行國王事賜之誥印五年王母陳老病乞藥物帝卽賜之尋與瓦刺土魯番遣使三百餘人來貢邊臣以聞廷議貢有定期今前使未回後使又至且瓦刺強寇今乃與哈密偕非哈密

挾其勢以邀利卽瓦刺假其事以窺邊帝乃却其獻令邊臣宴賚遣還貢使堅不受賜必欲親詣闕下乃命遣十之一赴京八年把塔木兒子罕慎以父卒請嗣職帝許之而不命其主國事國中政令無所出土魯番速檀阿力乘機襲破其城執王母奪金印以忠順王孫女爲妾據守其地九年四月事聞命邊臣謹戒備救罕東赤斤諸衛協力戰守尋遣都督同知李文右通政劉文赴甘肅經略抵肅州遣錦衣千戶馬俊奉敕往諭時阿力留其妹婿牙蘭守哈密而已攜王母金印已返土魯番俊至諭以朝命抗詞不遜羈俊月餘一日牙蘭忽至言大兵三萬卽日西來阿力乃宴勞俊等昇王母出見王母懼不敢言夜潛遣人來云爲我奏天子速發兵救哈密

文等以聞遂檄都督罕慎及赤斤罕東七克力諸部集兵進討十年冬兵至卜隆吉兒川謀報阿力集衆抗拒且結別部謀掠罕東赤斤二衛文等不敢進令二衛還守本土罕慎及七克力畏兀兒之衆退居苦峪文等亦引還肅州帝乃命罕慎權主國事因其請給米布且賜以穀種文等竟無功而還土魯番知中國不足憚久據哈密罕慎恃赤斤罕東而二衛又自相讐殺罕慎勢益孤朝命邊臣築苦峪城移哈密衛於其地罕慎圖興復乃糾罕東赤斤得兵一千三百人與已所部共萬人以十八年春夜襲哈密城破之牙蘭遁走乘勢連復八城遂還居故土巡撫王朝遠以聞帝喜賜敕獎勵并獎二衛朝遠請封罕慎爲王且言土魯番亦革心向化與罕慎



議和宜乘時安撫取還王孫女及金印俾隨王母共掌國事  
哈密國人亦乞封罕慎廷議不從乃進左都督賚白金百兩  
綵幣十表裏特敕獎勞將士陞賞有差久之罕慎乞命官取  
還金印及王孫女不從命自遣人往索弘治元年從其國人  
請封罕慎爲忠順王土魯番阿力已死而其子阿黑麻嗣爲  
速檀僞與罕慎結婚誘而殺之仍令牙蘭據其地哈密都指  
揮阿木郎來奔求救廷臣請諭土魯番貢使令復還侵地并  
敕赤斤罕東共圖興復而已明年哈密舊部綽卜都等率衆  
攻牙蘭殺其弟奪其叛臣者盼卜等人畜以歸事聞進秩加  
賞先是罕慎遣使來貢未還而遭難其弟奄克孛刺率部衆  
逃之邊方朝命以賜罕慎者還賜其弟阿黑麻之去哈密也

止留六十人佐牙蘭阿木郎覘其單弱請援於邊臣調赤斤  
罕東兵夜襲破其城牙蘭遁去斬獲甚多以力薄不能守引  
還有詔獎賚當是時阿黑麻桀傲甚自以地遠中國屢抗天  
子命破哈密而貢使頻至中朝仍善待之由是益輕中國天  
子乃薄其賜賚或拘留使臣却其貢物敕責令悔罪訪獲忠  
順王族孫陝巴將輔立之阿黑麻漸警懼三年遣使叩關願  
獻還哈密及金印釋其拘留使臣天子納其貢仍留前使者  
明年果以城印來歸乃從馬文升言還其所拘使臣文升又  
言番人重種類且素服蒙古哈密故有回回畏兀兒哈刺灰  
三種北山又有小列禿也克力相侵逼非得蒙古後裔鎮之  
不可今安定王族人陝巴乃故忠順王脫脫近屬從孫可主

哈密天子以爲然而諸番亦共奏陝巴當立五年春立陝巴爲忠順王賜印誥冠服及守城戎器擢阿木郎都督僉事與都督同知奄克字刺共輔之已而諸番索陝巴犒賜不得皆怨阿木郎又引七克力人掠土魯番牛馬阿黑麻怒六年春潛兵夜襲谷密殺其人百餘逃及降者各半陝巴與阿木郎據大土刺以守大土刺華言大土臺也圍三日不下阿木郎急調七克力瓦刺二部兵來援俱敗去乃執陝巴支解阿木郎復令牙蘭據守移書邊臣訴阿木郎罪時土魯番先後貢使皆未還邊臣以其書不遜且僭稱可汗乞命將遣兵先勦除牙蘭然後直抵土魯番誡阿黑麻之首取還陝巴否則降敕嚴責令還陝巴乃宥其罪廷議從後策令守臣拘貢使縱

數人還齋救曉示禍福帝如其請而命廷推大臣赴甘肅經略初哈密變聞丘濬謂馬文升曰西陲事重須公一行文升曰國家有事臣子義不辭難然番人嗜利不善騎射自古未有西域能爲中國患者徐當靖之濬復以爲言文升請行廷臣僉言北寇強本兵未可遠出乃推兵部右侍郎張海都督同知緱謙二人帝賜敕指授二人者甚備而二人皆庸才但遣土魯番人歸諭其主令獻還侵地身駐甘州待之明年阿黑麻遣使叩關求貢詭言願還陝巴及哈密乞朝廷亦還其使者海等以聞請再降敕宣諭廷議言先已降敕今若再降有傷國體宜令海等自遣人往諭不從命則仍留前使且盡驅新使出關永不許貢仍與守臣檄罕東赤斤諸部兵直擣

哈密襲斬牙蘭如無機可乘則封嘉峪關毋納其使陝巴雖封王其來與否於中國無損益宜別擇賢者代之帝以陝巴既與中國無損益則哈密城池已破如獻還當若何處之廷臣復言陝巴乃安定王千奔之姪忠順王之孫向之封王欲令鎮撫一方爾今被擄孱弱可知即使復還勢難復立宜革其王爵居之甘州犒賚安定王諭以不復立之故令都督奄克孛刺總理哈密事與回回都督寫亦虎仙哈刺灰都督拜迭力迷失等分領三種番人以輔之且修濬苦峪城塹凡番人散處甘涼者令悉還其地給以牛具口糧若陝巴未還不索取意謂我不急陝巴彼將自還也帝悉如其言敕諭海等海等見敕書將棄陝巴甚喜卽逐其貢使閉嘉峪關繕修

苦峪城令流寓番人歸其地拜疏還朝八年正月至京言官交章劾其經略無功竝下吏貶秩而哈密終不還文升銳意謀興復用許進巡撫甘肅以圖之進偕大將劉寧等潛師夜襲牙蘭乘善馬逸去斬其遺卒撫降餘衆而還自明初以來官軍無涉其地者諸番始知畏阿黑麻亦欲還陝巴然哈密屢破遺民入居者且暮處寇而阿黑麻果復來攻固守不下迄散去諸人自以窮窘難守盡焚室廬走肅州求濟邊臣以聞詔賜牛具穀種并發流寓三種番人及哈密之寄居赤斤者盡赴苦峪及瓜沙州俾自耕牧以圖興復時哈密無王奄克孛刺爲之長十年遣其黨寫亦虎仙等來貢已給幣帛五千酬其直而使臣猶久留大肆魚然禮官徐瓊等極論其罪

乃驅之去時諸番以朝廷閉關絕貢不得入咸怨阿黑麻阿黑麻悔送還陝巴及哈密之衆乞通貢如故廷議謂無番文不可驟許必令具文乃從其請陝巴前議廢今使暫居甘州俟衆頭目俱歸心然後修復哈密城塹令復舊業帝悉從之其冬起王越總制三邊軍務兼經理哈密十一年秋越言哈密不可棄陝巴亦不可廢宜仍其舊封令先還哈密量給修城築室之費而犒賜三種番人及赤斤罕東小列秃七克力諸部以獎其前勞且責後效帝亦報可自是哈密復安而土魯番亦修貢惟謹奄克孛刺者罕慎弟也與陝巴不相能當事患之令陝巴娶罕慎女與之結好而陝巴嗜酒搃剋衆心部下阿孛刺等咸怨十七年春陰搆阿黑麻迎其幼子真

帖木兒主哈密陝巴懼挈家走苦峪奄克孛刺與寫亦虎仙在肅州邊臣以二人爲番衆所服令還輔陝巴與百戶董傑偕行傑有膽略旣抵哈密阿孛刺與其黨五人約夜中以兵來劫傑知之與奄克孛刺等謀召阿孛刺等計事立斬之其下遂不敢叛乃令陝巴還哈密真帖木兒還土魯番真帖木兒年十三其母卽罕慎女也聞父已死兄滿速兒嗣爲速檀與諸弟相讐殺懼不敢歸願倚奄克孛刺曰吾外祖也邊臣慮與陝巴隙居之甘州十八年冬陝巴卒其子拜牙卽自稱速檀命封爲忠順王正德三年寫亦虎仙入貢不與通事偕行自攜邊臣文牒投進大通事王永怒疏請究治寫酋亦奏永需求永供奉豹房恃寵恣橫詔勿究治兩戒諭之寫酋自

是益輕朝廷潛懷異志初拜牙卽嗣職滿速兒與通和且遣使求直帖木兒邊臣言與之便樞臣謂土魯番稔惡久今見我扶植哈密聲勢漸張乃卑詞求貢以還弟爲名我留其弟正合古人質其親愛之意不可遽遣帝從之至六年始命寫亦虎仙偕都督滿哈刺三送之西還至哈密奄克孛刺欲止之二人不可護至土魯番遂以國情輸滿速兒且誘拜牙卽叛中國拜牙卽素昏愚性又淫暴心怵屬部害已而滿速兒又甘言誘之卽欲偕奄克孛刺同往不從奔肅州拜牙卽遂以八年秋棄城叛入土魯番滿速兒卽遣火者他只丁據哈密又遣火者馬黑木赴甘肅言拜牙卽不能守國滿速兒遣將代守乞犒賜九年四月事聞命都御史彭澤往經略澤未

至賊遣兵分掠苦峪沙州聲音予我金幣萬卽歸城印澤抵甘州謂番人嗜利可因而款也遣通事馬驥諭令還侵地及王當予重賞滿速兒僞許之澤卽界幣帛二千及白金酒器一具十一年五月拜疏言臣遣通事往宣國威要以重賞其曾悔過效順卽以金印及哈密城付之滿刺哈三寫亦虎仙二人召還他只丁并還所奪赤斤衛印惟忠順王在他所未還請錄效勞人役功賜臣骸骨歸田里帝卽令還朝而忠順王迄不返他只丁亦不肯退復要重賞始以城來歸明年五月甘肅巡撫李昆上言得滿速兒牒謂拜牙卽不可復位卽還故土已失人心乞別立安定王于奔後裔此言良然如必欲其復國乞敕滿速兒兄弟送還仍厚賜帛葢其效順廷

議經略西陲已踰三載而忠順迄無還期宜興師絕貢不可遂其要求損我威重但城印歸國體具在宜敕責滿速兒背負國恩求取無厭仍量賜其兄弟令其速歸忠順不從則閉關絕貢嚴兵爲備從之初爲亦虎仙與滿速兒深相結故首倡逆謀已而有罪滿速兒欲殺之大懼求他只丁爲解許賂幣千五百匹期至肅州界之且啗之入寇曰肅州可得也滿速兒喜令與其壻馬黑木俱入貢以覘虛實且徵其賂邊臣以同來火者撤者兒乃火者他只丁弟懼爲變并其黨虎都寫亦羈之甘州而督寫亦虎仙出關懼不肯去他只丁聞其弟被拘怒復誘奪哈密城請滿速兒移居之分兵脅據沙州擁衆入寇至兔兒壩游擊芮寧與參將蔣存禮都指揮黃榮

王琮各率兵往禦寧先抵沙子壩遇賊賊悉衆圍寧而分兵綴諸將寧所部七百人皆戰沒賊薄肅州城索所許幣副使陳九疇固守且先絕其內應賊知事洩慮援兵至大掠而去十二年正月羽書聞廷議復命彭澤總制軍務偕中官張永都督卻永率師西征賊還至瓜州副總兵鄭廉合奄克字刺兵擊敗之斬七十九級賊乃遁去又與瓦剌相攻力不敵移書求款澤等乃罷行先是寫亦虎仙與子米兒馬黑木壻火者馬黑木及其黨失拜烟荅俱以內應繫獄失拜烟荅被捶死及事平械寫亦虎仙赴京亦刑部獄其子仍繫甘州失拜烟荅子米兒馬黑木者寫亦虎仙姪婿也以入貢在京探知王瓊欲傾彭澤突入長安門訟父冤下錦衣獄會兵部法司

橫雲山集 列傳二百二  
請行甘肅訊報瓊欲因此興大獄奏遣科道二人往勘明年  
勘至於澤無所坐瓊怒劾澤欺罔辱國斥爲民坐昆九疇激  
變遂下吏竝獲重譴明年寫亦虎仙亦減死遂寅緣錢寧與  
其壻得侍帝左右帝悅之賜國姓授錦衣指揮扈駕南征滿  
速兒犯邊後屢求通貢不得十五年歸先所掠將卒及忠順  
王家屬復求貢廷議許之而王迄不還巡按御史潘倣力言  
貢不當許不聽明年世宗嗣位楊廷和以寫亦虎仙稔中國  
情實歸必爲邊患於遺詔中數其罪并其子壻竝伏誅而用  
陳九疇爲甘肅巡撫時滿速兒比歲來貢朝廷待之若故亦  
不復問忠順王事至嘉靖三年秋忽擁二萬騎圍肅州分兵  
犯甘州九疇及總兵官姜瓖等力戰敗之斬他只丁賊乃却

去事聞命兵部尚書金獻民西討抵蘭州賊已久退乃引還  
九疇因力言賊不可撫乞閉關絕貢專固邊防可之明年秋  
賊復犯肅州分兵圍參將雲冒而以大眾掠南山九疇時已  
解職他將援軍至賊始遁當是時番屢犯邊城當局者無能  
振國威爲天子効忠敵愾而一二新進用事者反借之以修  
宿怨由是封疆之獄起百戶王邦奇者素憾楊廷和彭澤六  
年春上言哈密失國番賊內侵由澤賂番求和廷和論殺  
寫亦虎仙所致誅此兩人庶哈密可復邊境無虞桂萼張璁  
輩欲藉此興大獄斥廷和澤爲民盡置其子弟親黨於理有  
自殺者復遣給事錦衣官往按番酋牙蘭言非敢獲罪天朝  
所以犯邊由冤殺寫亦虎仙失拜烟荅二人故今願獻還城

印贖前罪事下兵部尚書王時中等言番酋乞貢數四先已下總制尚書王憲因其貢使鐫責所請當不妄第其詞出牙蘭非真求貢之文或詐以款我若果悔罪必先歸城印及所掠人畜械送首惡稽首關門方可聽許帝納之萼以前獄未竟必欲重興大獄請留質牙蘭遣譯者諭其主還侵地而與禮兵二部尚書方獻夫王時中等協議爲挑激之詞言番人上書者四輩皆委咎前吏雖詞多詆飾亦事發有因宜遣官嚴覈激變虛實用服其心其他具如前議九疇報捷時言滿速兒牙蘭已斃砲石下二人實未死帝固疑之覽萼等議益疑邊臣欺罔手詔數百言切責九疇欲置之死而戒首輔楊一清勿黨庇遂遣官逮九疇尚書金獻民侍郎李昆以下坐

累者四十餘人七年正月九疇逮至下獄萼等必欲殺之并株連廷和澤刑部尚書胡世寧力救帝稍悟免死戍邊澤獻民等皆落職番酋氣益驕而萼又薦王瓊督三邊盡釋還九疇所繫番使許之通貢番酋迄不悔罪侮玩如故其年牙蘭獲罪其主率部帳來歸邊臣受之滿速兒怒其部下虎力納咱兒引瓦剌二千餘騎犯肅州至老鸛堡值撒馬兒罕貢使在堡中賊呼與語游擊彭濬急引兵擊之賊言欲問信通和濬不聽進戰破之賊遁走赤斤使人持番文求貢委罪瓦剌詞多悖謾瓊希時貴指必欲議撫因言番人且悔宜原情赦罪以罷兵息民并上濬及副使趙載功狀章下兵部初胡世寧之救陳九疇也欲棄哈密不守言拜牙即久歸土魯番即



還故土亦其臣屬其他族裔無可繼者回回一種早已歸之  
哈刺灰畏兀兒二族逃附肅州已久不可驅之出關然則哈  
密將安興復哉縱得忠順嫡派畀之金印助之兵食誰與爲  
守不過一二年復爲所奪益彼富強辱我皇命徒使再得城  
印爲後日要挾之地乞聖明熟籌如先朝和寧交趾故事置  
哈密勿問如其不侵擾則許之通貢否則閉關絕之庶不以  
外番疲中國倉事霍韜力駁其非至是世寧改掌兵部上言  
番酋變詐多端欲取我肅州則漸置奸回於內地事覺則多  
縱反間傾我輔臣乃者許之朝貢使方入關而賊兵已至河  
西幾危此閉關與通貢利害較然今瓊等旣言賊薄我城堡  
縛我士卒聲言大舉以恐喝天朝而又言賊方懼悔宜仍許

通貢何自相牴牾若是霍韜又以賊無印信番文爲疑臣謂  
卽有印信又安足據第毋墮其術中以間我忠臣勉我邊備  
斯可矣牙蘭本我屬番爲彼掠去今束身來歸事屬反正宜  
卽撫而用之招彼攜貳益我藩籬至於興復哈密臣等竊以  
爲非中國所急也夫哈密三立三絕今其王已爲賊用民盡  
流亾借使更立他種彼強則入寇弱則從賊難保爲不侵不  
叛之臣故臣以爲立之無益適令番酋挾爲奸利耳乞賜瓊  
璽書令會同甘肅守臣遣番使歸諭滿速兒詰以入寇狀倘  
委爲不知則令械送虎力納咱兒或事出瓦刺則縛其人以  
自贖否則羈其使臣發兵往討庶威信竝行賊知斂戢更救  
瓊爲國忠謀力求善後之策以通番納貢爲權宜足食固圉

爲久計封疆幸甚疏入帝深然之命瓊熟計詳處毋輕信番  
言至明年甘肅巡撫唐澤亦以哈密未易興復請專圖自治  
之策瓊善之據以上聞帝報可自是置哈密不問土魯番許  
之通貢西陲藉以息肩而哈密後爲失拜烟荅子米兒馬黑  
木所有服屬土魯番朝廷猶令其比歲一貢異於諸番迄隆  
慶萬曆朝猶入貢不絕然非忠順王苗裔矣

柳城十名魯陝又名柳陳城卽後漢柳中地西域長史所治  
唐置柳中縣西去火州七十里東去哈密千里經一大川道  
旁多骸骨相傳有鬼魅行旅早暮失侶多逃死出大川渡流  
沙有山青紅如火山下有城屹然廣二三里卽柳城也四面  
皆田園流水環繞樹木陰翳土宜稼麥豆麻有桃李棗瓜胡

蘆之屬而葡萄最多小而甘無核名鎮子葡萄畜有牛羊馬  
駝節候常和土人淳朴男子椎結嬾人蒙皂布其語音類畏  
兀兒永樂四年劉帖木兒使別失八里因命齋綵幣賜柳城  
酋長明年其萬戶瓦赤刺卽遣使來貢七年傅安自西域還  
其酋復遣使隨入貢帝卽命安齋綺帛報之十一年夏遣使  
隨白阿兒忻台入貢其冬萬戶觀音奴再遣使隨安入貢二  
十年與哈密共貢羊二千宣德五年其頭目阿黑把失來貢  
正統五年十三年並入貢自後不復至柳城密邇火州土魯  
番凡天朝遣使及其酋長入貢多與之偕後土魯番強二國  
並爲所滅

火州又名哈刺在柳城西七十里土魯番東三十里卽漢車

師前王地隋時爲高昌國唐太宗滅高昌以其地爲西州宋時回鶻居之嘗入貢元名火州與安定曲先諸衛統號畏兀兒置達魯花赤監治之永樂四年五月命鴻臚丞劉帖木兒護別失八里使者歸因齎綵幣賜其王子哈散明年卽遣使貢玉璞方物其使臣言回回行賈京師者甘涼軍士多私送出境洩漏邊務帝命御史往按且敕總兵官宋晟嚴束之七年遣使偕哈烈撒馬兒罕來貢十一年夏都指揮白阿兒忻台使其國遣使偕俺的干失刺思等九國來貢其秋命陳誠李暹等以璽書文綺紗羅布帛往勞十三年冬遣使隨誠等來貢自是久不至正統十三年復來貢後遂絕其地多山青紅若火故名火州氣候熱五穀畜產與柳城同城方十餘里

僧寺多於民居東有荒城卽高昌國都漢戍已校尉所治西北連別失八里國小不能自立後爲土魯番所并

土魯番在火州西百里去哈密千餘里嘉峪關二千六百里漢車師前王地隋高昌國唐滅高昌置西州及交河縣此則交河縣安樂城也宋復名高昌爲回鶻所據嘗入貢元設萬戶府永樂四年遣官使別失八里道其地以綵幣賜之其萬戶賽因帖木兒遣使來朝貢玉璞明年達京師六年其國番僧清來率徒法泉等朝貢天子欲令化導番俗卽授爲灌頂慈慧圓智普通國師徒七人竝爲土魯番僧綱司官賜賚甚厚由是其徒來者不絕貢名馬海青及他物天子亦數遣官獎勞之二十年其酋尹吉兒察與哈密共貢馬千三百匹賜

賚有加已而尹吉兒察爲別失八里酋歪思所逐走歸京師  
天子憫之命爲都督僉事遣還故土尹吉兒察德中國洪熙  
元年躬率部落來朝宣德元年亦如之天子待之甚厚渥還  
國病卒三年其子滿哥帖木兒來朝已而都督鎖恪弟猛哥  
帖木兒來朝命爲指揮僉事五年都指揮僉事也先帖木兒  
來朝正統六年朝議土魯番久失貢因米昔兒使臣還令齎  
鈔幣賜其酋巴刺麻兒明年遣使入貢初其地介于闐別失  
八里諸大國間勢甚微弱後侵掠鄰境火州柳城皆爲所并  
國日強其酋也密力火者遂僭稱王以景泰三年偕其妻及  
部下頭目各遣使入貢天順三年復貢其使臣進秩者二十  
有四人先後命指揮白全都指揮桑斌等使其國成化元年

禮官姚夔等定議土魯番三年或五年一貢貢不得過十人  
五年遣使來貢其酋阿力自稱速檀奏求海青鞍馬蟒服綵  
幣器用禮官言物多違禁不可盡從命賜綵幣布帛明年復  
貢奏求忽撥思箏鼓羅靴鐙高麗布諸物廷議不許是時土  
魯番愈強而哈密以無主削弱阿力欲并之九年春襲破其  
城執王母奪金印分兵守之而去朝廷命李文等經略無功  
而還而阿力修貢如故一歲中使來者三朝廷仍善待之未  
嘗一語嚴詰貢使益傲求馴象兵部言象以備儀衛禮有進  
獻無求索乃却其請其使臣復言已得哈密城池及瓦刺奄  
檀王人馬一萬又收捕曲先并亦思渴頭目倒刺火只乞朝  
廷遣使通道往來和好帝曰迤西道無阻不須遣官阿力果

誠心修貢朝廷不計前愆仍以禮待頃之其使臣復言赤斤諸衛素與有仇乞遣將士護行且謂阿力雖得哈密止以物產充貢願質使臣家屬於邊賜敕歸諭其王獻還城印帝從其護行之請而賜敕諭阿力獻王母及城印即和好如初使臣還復遣他使再入貢而不還哈密十二年八月甘州守臣言番使謂王母已死城印俱存俟朝廷往諭即獻還帝已却其貢使復俾入京當是時大臣專務姑息致還方小醜玩侮無顧忌十四年阿力死其子阿黑麻嗣為速檀遣使來貢十八年哈密都督罕慎潛師擣哈密克之賊將牙蘭遁走阿黑麻頗懼朝議罕慎有功將立為王阿黑麻聞之怒曰罕慎非忠順族安得立乃偽與結婚以弘治元年躬至哈密城下誘

罕慎盟執殺之復據其城而遣使入貢稱與罕慎締姻乞賜蟒服及九龍渾金膝襴諸物使至甘州而罕慎之變已聞朝廷亦不罪但令還諭其王歸我侵地番賊知中國易與不奉命而復遣使來貢禮官議薄其賞拘使臣番賊稍懼三年春借撒馬兒罕貢獅子願獻還城印朝廷亦還其使臣禮官請却勿納帝不從及使還命內官張葑護行諭內閣草敕閣臣劉吉等言阿黑麻背負天恩殺我所立罕慎宜立遣大將直搗巢穴滅其種類始足雪中國之憤或不即討亦當如古帝王封玉門關絕其貢使猶不失大體今皆不然寵其使臣厚加優待又遣中使伴送此何理哉陛下事遵成憲今秋乃無故召番人入大內看戲獅子大賚御品誇耀而出都下聞之

咸爲駭歎謂祖宗以來從無此事夫非我族類其心必異奈何屈萬乘之尊爲奇獸之玩俾異言異服之人襍遯清嚴之地哉況使臣滿刺土兒卽罕慎外舅忘主事讐逆天無道而阿黑麻聚集人馬謀犯肅州名雖奉貢意實叵測兵部議羈其使臣正合事宜若不停張芾之行彼使臣還國阿黑麻必謂中土帝王亦可通情希寵大臣謀國君不聽信其奈我何長番賊之志損天朝之威莫甚於此疏入帝止芾行而問閣臣興師絕貢二事吉等以時勢未能但請薄其賜賚因言飼獅日用二羊十歲則七千二百羊矣守獅日役校尉五十人一歲則一萬八千人矣若絕其餵養聽其自斃傳之千載實爲美談帝不能用其秋又遣使從海道貢獅子朝命却之其

使乃潛詣京師禮官請治沿途有司罪仍却其使從之當是時中外又安大臣馬文升耿裕輩咸知國體於貢使多所裁損阿黑麻稍知中國有人乃以四年秋遣使再貢獅子願還金印及所據十一城邊臣以聞許之果以城印來歸明年封陝巴爲忠順王納之哈密厚賜阿黑麻使臣先所拘者盡釋還六年春其前使二十七人還未出境後使三十九人猶在京師而阿黑麻復襲陷哈密執陝巴以去帝命侍郎張海等經略而優待其使俾得進見禮官耿裕等諫曰朝廷馭外番宜惜大體番使自去年入都久不宣召乃今春三月以來宣召至再且賜幣帛羊酒正當謾書投入之時小人何知將謂朝廷恩禮視昔有加乃畏我而然事干國體不可不慎況此

賊崛強無禮久蓄不庭之心所遣使臣必其親信腹心乃令出入禁掖略無防閑萬一奸宄窺伺潛逞逆謀雖悔何及今其使寫亦滿速兒等宴賚已竣猶不肯行曰恐朝廷復宣召夫不寶遠物則遠人格獅本野獸不足爲奇何至上煩鑾輿屢加臨視致荒微小醜得覲聖顏藉爲口實疏入帝卽遣還張海等抵甘肅遵朝議却其貢物羈前後使臣一百七十二人於邊閉嘉峪關永絕貢道而巡撫許進等又潛兵直擣哈密走牙蘭阿黑麻漸懼其鄰邦不獲貢胥怨阿黑麻乃以十年冬送還陝巴款關求貢廷議許之十二年其使再來命前使安置廣東者悉釋還十七年阿黑麻死諸子爭立相仇殺已而長子滿速兒嗣爲速檀修貢如故明年忠順王陝巴卒

子拜牙卽襲昏愚失道國內益亂而滿速兒桀黠變詐踰於父復有吞哈密之志正德四年以其弟真帖木兒在甘州因貢使乞放還朝議不許久之以甘肅守臣奏始送之還還卽以邊情告其兄共謀爲逆九年遂誘拜牙卽叛復據哈密朝廷遣彭澤經略贖還城印其部下他只丁復據之且導滿速兒犯肅州自是哈密不可復得而患且中於甘肅會中朝大臣自相傾陷番酋覘知之益肆讒構賊腹心得侍天子中國體大虧賊氣焰益盛十五年遂復許通貢甘肅巡按潘倣言番賊犯順殺戮剽掠慘不可勝言今雖悔罪果足贖前日萬一乎數年以來雖嘗閉關未能問罪今彼以困憊求通且將窺我意向探我虛實緩我後圖誘我重利不於此時稍正其

罪將益啓輕慢之心招反覆之釁非所以尊中國馭外蕃也  
況彼番文執難從之詞示敢拒之狀當悔罪求通之日爲侮  
慢不恭之語其變詐已見若曰來者不拒馭戎之常盡略彼  
事之非納求和之使必將叨冒恩禮飽饜賞餼和帑私販滿  
載而歸所欲旣足驕志復萌少不慊心動卽藉口反覆之釁  
且在目前何則彼叛則未有罪而反獲鈔掠之利來則未必  
見拒而更有賜賚之榮又何憚而不爲臣謂宜乘窘迫之時  
聊爲懼伏之計雖納其悔過之詞姑阻其來貢之使降救責  
其犯順仍索歸還未盡之人其番文可疑者詳加詰問使彼  
知中國尊嚴天威難犯庶幾反側不萌歸服可久時王瓊力  
主款議不納其言明年世宗立賊腹心寫亦虎仙伏誅失所

恃再謀犯邊嘉靖三年寇肅州掠甘州四年復寇肅州皆失  
利去於是卑詞求貢會張桂等起封疆之獄遂陰庇滿速兒  
再許之貢議已定矣賊黨牙蘭者本曲先人幼爲蕃掠長而  
黠健阿力以妹妻之握兵用事久爲西陲患至是得過其主  
七年夏率所部二千人來降有帖木兒哥土巴者俱沙州番  
族土魯番役屬之歲徵婦女牛馬不勝侵暴亦率其族屬數  
千帳來歸邊臣悉處之內地滿速兒怒使其部下虎力納咱  
兒引瓦剌寇肅州不勝則復遣使求貢總督王瓊請許之詹  
事霍韜言番人攻陷哈密以來議者或請通貢或請絕貢聖  
諭必有悔罪番文然後許今王瓊譯進之文皆其部下小醜  
之語無印信足憑我遽許之恐戎心益驕後難駕馭可虞者



一哈密城池雖稱獻還然無實據何以興復或者遂有棄置不問之議彼愈得志必且劫我罕東誘我赤斤掠我瓜沙外連瓦剌內擾河西而邊警無時息矣可虞者二牙蘭為番酋腹心擁衆來奔而彼云不知所向安知非詐降以誘我他日犯邊曰納我叛臣也我不歸彼叛臣彼不歸我哈密自是西陲益多事而哈密終無興復之期可虞者三牙蘭之來日給廩餼所費實多猶曰羈縻之策不獲已也倘番酋擁衆叩關索彼叛人將予之邪抑拒之邪又或牙蘭包藏禍心構變於內內外協應何以禦之可虞者四或曰今陝西饑困甘肅孤危哈密可棄也臣則曰保哈密所以保甘肅也保甘肅所以保陝西也若以哈密難守卽棄哈密然則甘肅難守亦棄甘

肅乎昔文皇之立哈密也因元遺孽力能自立因而立之彼假其名我享其利今忠順之嗣三絕矣天之所廢孰能興之今於諸夷中求其雄傑能守哈密者卽畀金印俾和輯諸番爲我藩蔽斯可矣必求忠順之裔而立焉見其固也疏入帝嘉其留心邊計下兵部確議尚書胡世寧等力言牙蘭不可棄哈密不必興復請專圖自治之策帝深納其言自是番酋許通貢而哈密城印及忠順王存亾置不復問河西獲休息焉然滿速兒桀傲益甚矣十二年遣人奏三事一請追治巡撫陳九疇罪一請遣官議和一請還叛人牙蘭詞多悖慢朝廷不能罪但戒以修職貢無妄言然自寫亦虎仙誅他只丁陣歿牙蘭又降失其所倚賴勢亦漸孤部下各自雄長稱

王入貢者多至十五人政權亦不一十五年甘肅巡撫趙載  
陳邊事言番酋屢服屢叛我撫之太厚信之太深愈長其奸  
狡今後入犯宜戮其使臣徙其從人於兩粵閉關拒絕卽彼  
悔罪亦但許奉貢不得輒還從人彼內有所牽外有所畏自  
不敢輕犯帝頗採其言二十四年滿速兒死長子沙嗣爲速  
檀其弟馬黑麻亦稱速檀分據哈密已而兄弟讐殺馬黑麻  
乃結婚瓦剌以抗其兄且墾田沙州謀入犯其部下來告馬  
黑麻乃叩關求貢復求內地安置邊臣諭之乃還故土與  
兄同處總督張珩以聞詔許其入貢二十六年定令五歲一  
貢其後貢期如令而來使益多逮世宗末年番文至二百四  
十八道朝廷重違其情咸爲給賜隆慶四年馬黑麻嗣兄職

遣使謝恩其弟瓚非等三人亦各稱速檀遣使來貢禮官請  
裁其犒賜許附馬黑麻隨從之數可之迄萬曆朝奉貢不絕

王入貢者多至十五人政權亦不一十五年甘肅巡撫  
 陳邊事言奇西屢服屢徵我禮之大厚信之大深愈  
 較今後人犯宜戮其使臣徒其從人於兩粵開明  
 悔罪亦但許奉貢不得輒還從人彼內有所  
 不敢輕犯帝頗採其言二十四年滿速兒  
 檀其弟馬黑麻亦稱速檀分據哈密已而兄弟營後馬黑麻  
 乃結婚瓦剌以抗其兄且舉田沙州謀入犯其部下來告  
 黑麻乃叩關求貢復求內地安置邊臣論  
 見同處總督張瑄以聞詔許其人貢二十六年定令瓦  
 茲其誠願有相溫黑麻謝翁之禮西之茲高祖即奉貢不  
 數劫也以其策還非善三人亦各歸還其來貢歸官

